

韋莊浣花集序

余家之兄莊自庚子亂離前凡著歌詩文章數十通屬兵火迭興簡編俱墜唯餘口誦舊所存無幾爾後流離漂泛寓目緣情子期懷舊辭王粲傷時之製或離羣軫慮或反袂興悲四愁九愁之文一詠一觴之作迄於癸亥歲又綴僅千餘首庚申夏自中諫

辛酉春應聘

爲西蜀奏記明年浣花溪尋得杜工部舊址雖蕪沒已久而柱砥猶存因命芟夷結茅爲一室蓋欲思其人而成其處非敢廣其基構耳藹便

因閑日錄兄之藁草中或默記於吟詠者次爲
目之曰浣花集亦杜陵所居之義也餘
今之所製則俟爲別錄用繼於右時癸亥年六
月九日藹集

浣花集目錄

京兆 韋 莊 端已

卷第一

章臺夜思

延興門外作

劉得仁墓

下第題青龍寺僧房

號州澗東村居作

送日本國僧敬龍歸

對酒

尹喜宅

途中望雨懷歸

古離別

柳谷道中作却寄

灞陵道中作

秋日早行

歎落花

宮怨

關河道中

題盤頭驛水館後軒

梁氏水齋

曲池作

嘉會里閑居

夏夜

早發

寓言

對雪獻薛常侍

題裴端公郊居

登咸陽縣樓望雨

貴公子

聽趙秀才彈琴

觀獵

三堂東湖作

放榜日作

寄薛先輩

訪含弘山僧不遇留題精舍

寄從兄遵

漁塘十六韻

冬日長安感志寄獻虢州崔郎中二十韻

和薛先輩見寄初秋寓懷即事之作二十

韻

同舊韻

三用韻

驚秋

登漢高廟閑眺

耒陽縣浮山神廟

愁

村居書事

三堂早春

卷第二

雨霽晚眺

立春日作

贈雲陽縣裴明府

賊中與蕭韋二秀才同卧重疾二君尋愈
余獨加焉恍惚之中因有題

重圍中逢蕭校書

咸通

白櫻桃

夜景

宿山家

長年

辛丑年

思歸

憶昔

合歡蓮花

覽蕭必先卷

和人歲晏旅舍見寄

宿泊孟津寄三堂友人

對酒賦友人

天井關

贈邊將

春日

早秋夜作

寄江南逐客

冬夜

又聞湖南荆渚相次陷沒

家叔南遊却歸因獻賀

楚行吟

卷第三

洛陽吟

過舊宅

喻東軍

清河縣樓作

北原閑眺

贈戍兵

覩軍迴戈

中渡晚眺

河內別村業閑題

聞官軍繼至未覩凱旋

和集賢侯學士分司丁侍御秋日雨霽之

作

題安定張使君

穎陽縣

寄園林主人

洛北村居

對梨花贈皇甫秀才

立春

村笛

題李斯傳

贈薛秀才

和元秀才別業書事

紀村事

題許仙師院

離筵訴酒

不寐

贈武處士

題吉澗盧拾遺莊

題穎源廟

東遊遠歸

新正日商南道中作寄李明府

春暮

哭麻處士

春早

和友人

春愁

晚春

題許渾詩卷

贈禮佛名者

殘花

卷第四

上元縣

江上逢史館李學士

金陵圖

謁蔣帝廟

聞再幸梁洋

王道者

陪金陵府相中堂夜宴

和侯秀才同友生泛舟溪中相招之作

贈野童

代書寄馬

題淮陰侯廟

送崔郎中往使西川行在

潤州顯濟閣曉望

觀浙西府相畋遊

官莊

解維

雨霽池上作呈侯學士

寓言

哭同舍崔員外

題姑蘇凌處士莊

過當塗縣

江亭酒醒却寄維揚餞客

臺城

贈漁翁

過揚州

寄右省李起居

鑷白

漳亭驛小櫻桃

酬吳秀才雪川相送

對雨獨酌

夏初與侯補闕江南有約共泛淮汴西赴
行朝莊自九驛路先至甬橋補闕由淮
楚續至泗上寢病旬日遽聞捐館迴首
悲慟因成長句四韻弔之

汴堤行

旅次甬西見兒童以竹槍紙旗戲爲陣列
主人叟曰斯子也三世沒於陣思所襲
祖父讎余因感之

自孟津舟西上雨中作

含山店夢覺作

題貂黃嶺官軍

過內黃縣

雜感

垣縣山中尋李書記山居不遇留題河次
店

送人遊并汾

卷第五

李氏小池亭十二韻

遣興

婺州和陸諫議將赴闕懷_一訪羨山居

江上題所居

婺州屏居蒙右省王拾遺車枉降訪病中
延候不得因成寄謝

將卜蘭芷村居留別郡中在仕

和陸諫議避地寄東陽進退未決見寄

山墅閑題

江上逢故人

旅中感遇寄呈李秘書昆仲

送范評事入關

東陽酒家贈別二絕句

江上村居

江外思鄉

和鄭拾遺秋日感事一百韻

夢入關

送人歸上國

聞春鳥

櫻桃樹

獨鶴

新栽竹

稻田

浣花集目
庭前菊

燕來

倚柴關

題七步廊

語松竹

卷第六

不出院楚公

江邊吟

江南送李明府入關

送福州王先輩南歸

夜雪泛舟遊南溪

江行西望

銅儀

含香

春雲

雲散

袁州作

題袁州謝秀才所居

謁巫山廟

鷓鴣

宿蓬船

送李秀才歸荆溪

洪州送西明寺省上人遊福建

卷第七

建昌渡暝吟

歲除對王秀才作

酒渴愛江清

和李秀才郊墅早春吟興十韻

泛鄱陽湖

黃藤山下聞猿

章江作

南遊富陽江中作

饒州餘干縣琵琶洲有故韓賓客宣城裴尚書修行李侍郎舊居遺址猶存客有過之感舊因以和吟

九江逢盧員外

南昌晚眺

衢州江上別李秀才

湘中作

桐廬縣作

東陽贈別

寄湖州舍弟

信州西三十里山名仙人城下有月巖山
其狀秀拔中有山門如滿月之狀余因
行役過其下聊賦是詩

婺州水館重陽日作

避地越中作

撫州江口雨中作

信州溪岸夜吟作

訪潯陽友人不遇

東林寺再遇僧益大德

西塞山下作

齊安郡

夏口行寄婺州諸弟

卷第八

南省伴直

鄠杜舊居二首

寄江南諸弟

投寄舊知

癸丑年下第獻新先輩

題汧陽縣馬跑泉李學士別業

絳州過夏留獻鄭尚書

綏州作

卷第九

與東吳生相遇

庭前桃

丙辰年鄜州遇寒食城外醉吟七言五首

宜春縣北卜居不遂留題王秀才別墅二

首

鄜州留別張負外

病中間相府夜宴戲贈集賢盧學士

出關

卷第十

過樊川舊居

長安舊里

過漢陂懷舊

汧陽間

焦崖閣

雞公幘

浣花集目錄

韋莊字端己見素之孫唐昭宗乾寧元年進士授校書郎王建開偽蜀莊時在華州駕前遷起居舍人後為蜀相卒所著有浣花集其弟諱嘗為作序今不存姑缺之既刻其集又考得遺詩二篇附後作補遺云朱承爵子儋拜記

鈔本失其序目錄字無從補正可惜

浣花記

浣花集卷第一

杜陵

韋

莊端己

今體詩凡四十八首

章臺夜思

清瑟怨遙夜遶絃風雨哀孤燈聞楚角殘月下
章臺芳草已云暮故人殊未來鄉書不可寄秋
鴈又南迴

延興門外作

芳草五陵道美人金犢車綠奔穿內水紅落過
墻花馬足倦遊客鳥聲歡酒家王孫歸去晚宮

樹欲棲鴉

劉得仁墓

至公遺至藝終抱至冤沈名有詩家業身無戚
里心桂和秋露滴松帶夜風吟冥冥知春否墳
蒿日已深

下第題青龍寺僧房

千蹄萬轂一枝芳要路無媒果自傷題柱未期
歸蜀國曳裾何處謁吳王馬嘶春陌金羈鬧鳥
睡華林繡羽香酒薄恨濃消不得却將惆悵問
支郎

號州澗東村居作

東南騎馬出郊坰迴首寒煙隔郡城清澗漲時
翹鷺喜綠桑踈處哺牛鳴兒童見少生於客奴
僕驕多倨似兄試望家田還自適滿畦秋水稻
苗平

送日本國僧敬龍歸

扶桑已在渺茫中家在扶桑東更東此去與師
誰共到一船明月一帆風

對酒

何用巖棲隱姓名一壺春耐可忘形伯倫若有

長生術直到如今醉未醒

尹喜宅

荒原秋殿柏蕭蕭何代風煙占寂寥紫氣已隨
仙仗去白雲空向帝鄉消濛濛暮雨春雞唱漠
漠寒蕪雪兔跳音欲問靈蹤無處所十洲空闊閬
山遙

途中望雨懷歸

滿空寒雨漫霏霏去路雲深鎖翠微牧豎遠當
煙草立飢禽閑傍渚田飛誰家樹歷紅榴折幾
處籬懸白菌肥對此不堪鄉外思荷蓑遙羨釣

人歸

古離別

一作多情

晴煙漠漠柳鬢鬢不那離情酒半酣更把玉鞭馬
雲外指斷腸春色在江南

柳谷道中作却寄

馬前紅葉正紛紛馬上離情斷殺魂曉發獨辭
殘月店暮程遙宿隔雲村心如岳色留秦地夢
逐河聲出禹門莫怪苦吟鞭拂地有誰傾蓋待
王孫

灞陵道中作

春橋南望水溶溶一桁晴山倒碧峯秦苑落花
零露溼灞陵新酒撥醅濃青龍天矯盤雙闕丹
鳳襪褫隔九重萬古行人離別地不堪吟罷夕
陽鍾

秋日早行

上馬蕭蕭襟袖涼路穿禾黍繞宮墻半山殘月
露華冷一岸野風蓮萼香煙外驛樓紅隱隱渚
邊雲樹暗蒼蒼行人自是心如火兔走烏飛不
覺長

歎落花

一夜霏微露溼煙曉來和淚喪嬋娟不隨殘雪
埋芳草盡逐香風上舞筵西子去時遺笑靨謝
娥行處落金鈿飄紅墮白堪惆悵少別穠花又
隔年

宮怨

一辭同輦閉昭陽耿耿寒宵禁漏長釵上翠禽
應不返鏡中紅艷豈重芳螢低夜色棲瑤草水
咽秋聲傍粉墻展轉令人思蜀賦解將惆悵感
君王

關河道中

槐陌蟬聲柳市風驛樓高倚夕陽東往來千里
路長在聚散十年人不同但見時光流似箭豈
知天道曲如弓平生志業匡堯舜又擬滄浪學
釣翁學一作許

題盤豆驛水館後軒

極目晴川展畫屏地從桃塞接蒲城灘頭鷺占
清波立原上人侵落照耕去鴈數行天際沒孤
雲一點淨中生馮軒盡日不迴首楚水吳山無
限情

梁氏水齋

獨醉任騰騰琴棊亦自能卷簾山對客開戶犬
迎僧看蟻移苔穴聞蛙落石層夜窻風雨急松
外一菴燈

曲池作江一作

細雨曲池濱青袍草色新詠詩行信馬載酒喜
逢人性爲無機率家因守道貧若無詩自遣誰
奈寂寥春

嘉會里閑居

豈知城闕內有地出紅塵草占一方坊一作綠樹藏千
古春馬嘶遊寺客犬吠探花人寂寂無鍾鼓槐

行接紫宸

坊一作方

夏夜

傍水遷書榻開襟納夜涼
星繁愁晝熱露重覺
荷香蛙吹鳴還息
蛛羅滅又光
正吟秋興賦桐
影下西墻

早發

早霧濃於雨田深黍稻低
出門雞未唱過客馬
頻嘶樹色遙藏店泉聲
暗傍畦獨吟三十里城
月尚如珪

寓言

黃金日日銷還鑄仙桂年年折
又生兔走烏飛
如未息路塵終見泰山平

對雪獻薛常侍

璚林瑤樹忽珊珊急帶西風下
晚天皓鶴襪
飛不辨玉山重叠凍相連
松裝粉穗臨窻亞
水結冰錐簇溜懸
門外寒光利如劍
莫推紅袖訴
金船

題裴端公郊居

暫隨紅旆佐藩方
高跡終期卧故鄉
已近水聲
開澗戶更侵山色
架書堂蒲生岸脚
青刀利柳

拂波心綠帶長莫奪野人樵牧與白雲不識繡
衣郎

登咸陽縣樓望雨

亂雲如獸出山前細雨和風滿渭川盡日空濛
無所見鴈行斜去字聯聯

貴公子

大道青樓御苑東玉欄仙杏歷枝紅金鈴犬吠
梧桐月朱鬣馬嘶楊柳風流水帶花穿巷陌夕
陽和樹入簾櫳瑤池宴罷歸來醉笑說君王在
月宮

聽趙秀才彈琴

滿匣冰泉咽又鳴玉音閑澹入神清巫山夜雨
絃中起湘水清波指下生蜂簇野花吟細韻蟬
移高柳迸殘聲不須更奏幽蘭曲卓氏門前月
正明

觀獵

苑牆東畔欲斜暉傍苑穿花兔正肥公子喜逢
朝罷日將軍誇換戰時衣鶻翻錦翅雲中落犬
帶金鈴草上飛直待四郊高鳥盡棹^掉鞍齊向國
門歸

三堂東湖作

滿塘秋水碧泓澄十畝菱花晚鏡清影動新橋
橫蝟蝓岸鋪芳草睡鳩鶻蟾投夜魄當湖落嶽
倒秋蓮入浪生何處最添詩客興黃昏煙雨亂
蛙聲

放榜日作

一聲天鼓闢金扉三十仙才上翠微葛水霧中
龍乍變緱山煙外鶴初飛鄒陽暖艷催花發太
皞春光簇馬歸迴首便辭塵土世彩雲新換六
銖衣

寄薛先輩

懸知迴日綵衣榮仙籍高標第一名瑤樹帶風
侵物冷玉山和雨射人清龍翻瀚海波濤壯鶴
出金籠燕雀驚不說文章與門地自然毛骨是
公卿

訪含弘山僧不遇留題精舍

滿院桐花鳥雀喧寂寥芳草茂芊芊吾師正遇
歸山日閑客空題到寺年池竹閉門教鶴守琴
書開篋任僧傳人間不自尋行跡一片孤雲在
碧天

寄從兄遵

江上秋風正釣鱸九重天子夢翹車不將高卧
邀劉主自吐清談護漢儲滄海十年龍景斷碧
雲千里鴈行踈相逢莫話歸山計明日東封待
直廬

漁塘十六韻

在朱陽縣石嵒下古老
云洛水一派流出此山

洛水分餘脉穿巖出石稜碧經嵐氣重清帶露
華澄瑩澈通三島巖梧積萬層巢由應共到劉
阮想同登壁峻苔如畫山昏霧似蒸撼松衣有
雪題石硯生冰路熟雲中客名留域外僧飢猿

尋落椽闢鼠墮高藤嶮樹臨溪亞殘莎帶岸崩
持竿聊藉草待月好垂罾對景思任父開圖想
不興晚風輕浪疊暮雨溼煙凝似泛靈槎出如
迎羽客昇仙源終不測勝槩自相仍欲別誠堪
戀長歸又未能他時操史筆為爾著良稱

冬日長安感志寄獻虢州崔郎中二十

韻

帝里無成久滯淹別家三度見新蟾却洗丹桂
無人指阮籍青襟有淚霑溪上却思雲滿屋鏡
中唯怕雪生髯病如原憲誰能療蹇似劉禎豈

用占霧雨十年同隱遁風雷何日振沈潛吁嗟
每被更聲引歌咏還因酒思添客舍正甘愁寂
寂郡樓遙想醉慙慙已聞鈴閣懸新詔即向綸
闈副具瞻濟物便同川上楫慰心還似邑中黔
觀星始覺中郎貴問俗方知太守廉宅後綠波
棲畫鷁馬前紅袖簇丹檐閑招好客斟香蟻悶
對瓊華詠散鹽積凍慢封寒雷細暮雲高拔遠
峯尖訟堂無事冰生印水榭高唵月透簾松下
圍棊期褚胤筆頭飛箭薦陶謙未知匣劍何時
躍但恐鉛刀不再銛雖有遠心長擁篲耻將新

劍學編苦纒驚素節移銅律又見玄冥變玉籤
百口似萍依廣岸一身如燕戀高簷如今正困
風波力更向人中問宋纖

和薛先輩見寄初秋寓懷即事之作二

十韻

玉律初移候清風乍遠襟一聲蟬到耳千炬火
然心嶽靜雲堆翠樓高日半沈引愁憎莫角驚
夢怯殘碁露白凝湘簟風篁韻蜀琴鳥喧從果
爛堦淨任苔侵柿葉添紅景槐柯減綠陰採珠
逢寶窟閱石見瑤林魯殿鏗寒玉苔山激碎金

郊堂流桂影陳巷集車音名自張華顯詞因葛
亮吟水深龍易失天遠鶴難尋鑒貌寧慙樂論
才豈謝任義心孤劔直學海怒濤深既覩文兼
質翻疑古在今慙聞紆綠綬即候挂朝簪晚樹
連秋塢斜陽映暮岑夜蟲方唧唧疲馬正駸駸
託跡同吳燕依人似越禽會隨仙羽化香蟻且
同斟

同舊韻

大火收殘暑清光漸惹襟謝莊千里思張翰五
湖心暮角迎風急孤鍾向暝沈露滋三徑草日

動四隣礎簟委班姬扇蟬悲蔡琰琴方愁丹桂
遠已怯二毛侵甃石迴泉脉移棊就竹陰觸絲
蛛墮網避隼鳥投林貌愧潘郎壁文慙呂相金
但埋艷獄氣未發爨桐音靜笑劉琨舞閑思阮
籍吟野花和雨斲怪石入雲尋跡竟終非切幽
閑且自任趨時慙藝薄託質仰恩深美價方稀
古清名已絕今旣聞留縞帶詎肯擲著簪遲客
虛高閣迎僧出亂岑壯心徒戚戚逸足自駸駸
安羨倉中鼠危同幕上禽期君調鼎鼎他日俟
羊斟

三用韻

素律初迴馭商飈暗觸襟乍傷詩客思還動旅
人心蟬噪因風斷鱗遊見鷺沈笛聲隨晚吹松
韻激遙砧地覆青袍草窻橫綠綺琴煙霄難自
致歲月易相侵澗柳橫孤約巖藤架密陰瀟湘
期釣侶鄴杜別家林遺愧虞卿壁言依李布金
錚鏦聞郢唱次第發巴音螢影衝簾落蟲聲擁
砌吟樓高思共釣寺遠想同尋入夜愁難遣逢
秋恨莫任蝸遊苔徑滑鶴步翠塘深莫問榮兼
辱寧論古與今固窮憐甕牖感舊惜蒿簪晚日

舒霞綺遙天倚黛岑鴛鸞方翾翾驥整駸駸
未化投陂竹空思出谷禽感多聊自遣桑落且
閑斟

驚秋

不向煙波狎釣舟強親文墨事儒丘長安十二
槐花陌曾負秋風多少愁

登漢高廟閑眺

獨尋仙徑上高原雲雨深藏古帝壇天畔晚峯
青簇簇檻前春樹碧團團參差郭外樓臺小斷
續風中鼓角殘一帶遠光何處水釣舟閑繫夕

陽灘

耒陽縣浮山神廟

一郡皆傳此廟靈
廟前松桂古今青
山曾堯代
浮洪水地有唐臣
奠綠醺遠坐香風
吹寶蓋傍
簷煙雨溼巖局爲
霖自可成農歲何
用興師遠
伐邢

愁

避愁愁又至
愁至事難忘
夜作心中火
朝爲鬢
上霜不經公子
夢偏入旅人腸
借問高軒客
何鄉是醉鄉

村居書事

年年耕與釣
鷗鳥已相依
砌長蒼苔厚
藤抽紫
蔓肥風鶯移
樹轉雨燕入
樓飛不覺春
光暮
遠籬紅杏稀

三堂早春

獨倚危樓四望遙
杏花春墮馬聲驕
池邊冰刃
暖初落山上雪
稜寒未銷溪送
綠波穿郡宅日
移紅影度村橋
主人年少多情
味笑換金龜解
珥貂

浣花集卷第一

浣花集卷第二

杜陵京兆

韋

莊

端已

今體詩凡二十七首

雨霽晚眺

庚子年冬大
駕幸蜀後作

入谷路縈紆巖巔日欲晡嶺雲寒掃蓋溪雪凍
黏鬚卧草跼如兔聽冰怯似狐仍聞關外火昨
夜徹皇都

立春日作

九重天子去蒙塵御柳無情依舊春今日不關
妃妾事始知辜負馬嵬人

贈雲陽縣裴明府

南北三年一解携，海爲深谷岸爲蹊。已聞陳勝
心降漢，誰爲田橫國。號齊暴客至今猶，戰鶴故
人何處尚。驅雞歸來能作煙，波伴我有魚舟在
五溪。

賊中與蕭韋二秀才同卧重疾二君尋
愈余獨加焉恍惚之中因有題

與君同卧疾，獨我漸彌留。弟妹不知處，兵戈殊
未休。胸中疑晉豎，耳下鬪殷牛。縱有秦醫在，懷
鄉亦淚流。

重圍中逢蕭校書

相逢俱此地，此地是何鄉。側目不成語，撫心空
自傷。劔高無鳥度，樹暗有兵藏。底事征西將，年
年戍洛陽。

咸通

咸通時代物情奢，歡殺金張許。史家破產競留
天上樂，鑄山爭買洞中華。諸郎宴罷銀燈合，仙
子遊迴璧月斜。人意似知今日事，急催絃管送
年華。

白櫻桃

一作于
鄴詩

王母堦前種幾株水精簾外看如無只應漢武
金盤上瀉得珊珊白露珠

夜景

滿庭松桂雨餘天宋玉秋聲韻蜀絃烏兔不知
多事世星辰長似太平年誰家一笛吹殘暑何
處雙砧搗暮煙欲把傷心問明月素娥無語淚
娟娟

宿山家

山行侵夜到雲竇一星燈草動蛇尋穴枝搖鼠
上藤背風開藥竈向月展漁罾明日前溪路煙

蘿更幾層

長年

一作感懷

長年方悟少年非人道新詩勝舊詩十畝野塘
留客釣一軒春雨對僧碁花間醉任黃鸝紀事作語
亭上吟從白鷺窺大盜不將爐冶去有心重築
太平基

辛丑年

九衢漂杵已成川塞上黃雲戰馬閑但有羸兵
填渭水更無奇士出商山田園已沒紅塵裏弟
妹相逢白刃間西望翠華殊未返淚痕空溼劍

文班

思歸

暖絲無力自悠揚牽引東風斷客腸外地見花
終寂寞異鄉聞樂更淒涼紅垂野岸櫻還熟綠
染迴汀草又芳舊里若爲歸去好子期凋謝呂
安亡

憶昔

昔年曾向五陵遊子夜歌清月滿樓銀燭樹前
長似晝露桃華裏不知秋西園公子名無忌南
國佳人號莫愁今日亂離俱是夢夕陽唯見水

東流

合歡蓮花

虞舜南巡去不歸二妃相誓死江湄空留萬古
香魂在結作雙葩合一枝

覽蕭必先卷

滿軸編新句脩然大雅風名因五字得命合一
言通景盡才難盡吟終意未終似逢曹與謝煙
雨思何窮

和人歲宴旅舍見寄

積雪滿前除寒光夜皎如老憂新歲近貧覺故

交踈意合論文後心降得句初莫言常鬱鬱天
道有盈虛

宿泊孟津寄王堂友人

解纜西征未有期槐花又逼桂花時鴻臚陌上
歸耕晚金馬門前獻賦遲只恐愁苗生兩鬢不
堪離恨入雙眉分明昨夜南池夢還把漁竿詠
楚詞

對酒賦友人

多病仍多感君心自我心浮生都是夢浩歎不
如吟白雪篇篇麗清醑盞盞深亂離俱老大強

醉莫霑襟

天井關

太行山上雲深處誰向雲中築女牆短綆詎能
垂玉甃繚垣何用學金湯斷開嵐翠爲高壘截
斷雲霞作巨防守吏不教飛鳥過赤眉何路到
吾鄉

贈邊將

昔因征遠向金微馬出榆關一鳥飛萬里只携
孤劍去十年空逐塞鴻歸手招都護新降身
著文皇舊賜衣只待煙塵報天子滿頭霜雪爲

兵機

一作壯心無事別無機

春日

忽覺東風

一作君

景漸遲野梅山杏暗芳菲落星樓

上吹殘角偃月營中掛夕暉旅夢亂隨蝴蝶散

離魂

一作情

漸逐杜鵑飛紅塵遮

一作望

斷長安陌芳草

王孫暮不歸

早秋夜作

翠簟初清暑半銷撤簾松韻送輕飈莎庭露永

琴書潤山郭月明砧杵遙傍砌綠苔鳴蟋蟀遶

簷紅樹織蟪蛄不須更作悲秋賦王粲辭家鬢

已凋

寄江南逐客

二年音信阻湘潭花下相思酒半酣記得竹齋

風雨夜對床孤枕話江南

冬夜

睡覺寒爐酒半消客情鄉夢兩遥遥無人為我

磨心劒割斷愁腸一寸苗

又聞湖南荆渚相次陷沒

幾時聞唱凱旋歌處處屯兵未倒戈天子只憑

紅旆壯將軍空恃紫髯多屍填漢水連荆阜血

染湘雲接楚波莫問流離南越事戰餘空有舊
山河

家叔南遊却歸因獻賀

繚繞江南一歲歸歸來行色滿戎衣長聞鳳詔
徵兵急何事龍韜獻捷稀旅夢遠依湘水闊離
魂空伴越禽飛遙知倚棹思家處澤國煙深暮
雨微

楚行吟

章華臺下草如煙故郢城頭月似弦惆悵楚宮
雲雨後露啼花笑一年年

浣花集卷第二

浣花集卷第三

杜陵京兆

韋

莊

端已

今體詩凡三十九首

洛陽吟

時大駕在蜀巢寇未平洛中寓居作七言

萬戶千門夕照邊
開元時節舊風煙
宮官試馬遊三市
舞女乘舟上九天
騎北來空進主漢

皇西去竟昇仙
如今父老偏垂淚
不見承平四十年

過舊宅

華軒不見馬蕭蕭
廷尉門人久寂寥
朱檻翠樓

爲卜肆玉欄仙杏作春樵堦前雨落鴛鴦瓦竹
裏苔封蟬竦橋莫問此中銷歇寺事娟娟紅淚泣
芭蕉

喻東軍

四年龍馭守峨眉鐵馬西來步步遲五運未教
移漢鼎六韜何必待秦師幾時鸞鳳歸丹闕到
處烏鳶從白旗獨把一樽和淚酒隔雲遙奠武
侯祠

清河縣樓作

有客微吟獨凭樓碧雲紅樹不勝愁盤鵬迴印

天心沒遠水斜率日脚流千里戰塵連上苑九
江歸路隔東周故人此地揚帆去何處相思雪
滿頭

北原閑眺

春城迴首樹重重立馬平原夕照中五鳳灰殘
金翠滅六龍遊去市朝空千年王氣浮清洛萬
古坤靈鎮碧嵩欲問向來陵谷事野桃無語淚
花紅

贈戍兵

漢皇無事暫遊汾底處狐狸嘯作羣夜指碧天

占晉分曉磨孤劍望秦雲紅旌不卷風長急畫
角閑吹日又曛止竟有征須有戰洛陽何用久
屯軍

觀軍廻戈

關中羣盜已心離關外猶聞羽檄飛御苑綠莎
嘶戰馬禁城寒月搗征衣漫教韓信兵塗地不
及劉琨嘯解圍昨日屯軍還夜遁滿車空載洛
神歸

中渡晚眺

魏王堤畔草如煙有客傷時獨扣舷妖氣欲昏

唐社稷夕陽空照漢山川千重碧樹籠春苑萬
縷紅霞襯碧天家寄杜陵歸不得一迴回首一
潜然

河內別村業閑題

阮氏清風竹巷深滿溪松竹似山陰門當谷路
多樵客地帶河聲足水禽閑伴爾曹雖適意靜
思吾道好霑襟隣翁莫問傷時事一曲高歌夕
照沈

聞官軍繼至未覩凱旋

嫖姚何日破重圍秋草深來戰馬肥已有孔明

傳將略更聞王導得神機陣前鞞鼓晴應響城
上烏鳶飽不飛何事小臣偏注目帝鄉遙羨白
雲歸

和集賢侯學士分司丁侍御秋日雨霽
之作

洛岸秋晴夕照長鳳樓龍闕倚清光玉泉山淨
雲初散金谷樹多風正涼席上客知蓬島路坐
中寒有栢臺霜多慙十載遊梁士却伴賓鴻入
帝鄉

題安定張使君

器度風標合出塵桂宮何負一枝新成丹始見
金無滓衝斗方知劔有神憤氣不銷頭上雪政
聲空布海邊春中興若繼開元事堪向龍池作
近臣

穎陽縣

琴堂連少室故事即仙蹤樹老風聲壯山高臘
候濃雪多庭有鹿縣僻寺無鐘何處留詩客茅
簷倚後峯

寄園林主人

主人常不在春物爲誰開桃艷紅將落梨華雪

又催曉鶯閑自轉遊客暮空回尚有餘芳在猶
堪載酒來催一作推

洛北村居

十畝松篁百畝田歸來方屬大兵年巖邊石室
低臨水雲外嵐峯半入天鳥勢去投金谷樹鍾
聲遙出上陽煙無人說得中興事獨倚斜暉憶
仲宣

對梨花贈皇甫秀才

林上梨花雪壓枝獨攀瓊艷不勝悲依前此地
逢君處還是去年今日時且戀殘陽留綺席莫

推紅袖訴金厄騰騰戰鼓正多事須信明朝難
重持

立春

青帝東來日馭遲煖煙輕逐曉風吹罽袍公子
樽前覺錦帳佳人夢裏知雪圃乍開紅菜甲綵
幡新翦紀事作綠楊絲殷勤為作紀事作宜春曲題向
花牋帖繡楣作展

村笛

簫韶九奏韻淒鏘曲度雖高調不傷却見孤村
明月夜一聲牛笛斷人腸

題李斯傳

蜀魄湘魂萬古悲
未悲秦相死秦時
臨刑莫恨倉中鼠

贈薛秀才

相辭因避世相見尚兵戈
亂後故人少別來新
話多但聞哀痛詔未覩
凱旋歌欲結巖棲伴何
山好薜蘿

和元秀才別業書事

僻居春事好水曲亂花陰
浪過河移岸雛成鳥
別林綠錢榆貫重紅障
杏籬深莫飲宜城酒愁

多醉易沈

紀村事

綠蔓映雙扉循牆一徑微
雨多庭果爛稻熟渚
禽肥釀酒迎新社
遙砧送暮暉數聲牛上笛何
處餉田歸

題許仙師院

地古多喬木遊人到且吟
院開金鑲澁門映綠
篁深山色不離眼
鶴聲長在琴往來誰與熟乳
鹿住前林

離筵訴酒

感君情重惜分離送我殷勤酒滿卮不是不能
判酩酊却憂前路醉醒時

不寐

不寐天將曉心勞轉似灰蚊吟頻到耳鼠鬪競
緣臺戶闇知蟾落林喧覺雨來馬嘶朝客過知
是禁門開

贈武處士

一身唯一室高靜若僧家掃地留踈影穿池浸
落霞綠蘿臨水合白道向村斜賣藥歸來醉吟
詩倚釣查

題吉澗盧拾遺莊

主人西遊去不歸滿溪春雨長春薇怪來馬上
詩一作情好印破青山白鷺飛

題潁源廟

曾是巢由棲隱地百川唯說潁源清微波乍向
雲根吐去浪遙衝雪嶂橫萬木倚簷踈幹直羣
峯當戶曉嵐晴臨川試問堯年事猶被封人勸
濯纓

東遊遠歸

扣角干名計已踈劒歌休恨食無魚辭家柳絮

三春半臨路槐花七月初江上欲尋漁父醉日
邊時得故人書青雲不識揚生面天子何由問
子虛

新正日商南道中作寄李明府

相看又見歲華新依舊楊朱拭淚巾踏雪偶因
尋戴客論文還比聚星人嵩山不改千年色洛
邑長生一路塵今日與君同避世却憐無事是
家貧

春暮

一春春事好病酒起常遲流水綠縈砌落花紅

墮枝樓高喧乳燕樹密聞雛鷓不學山公醉將
何自解頤

哭麻處士

却到歌吟地閑門草色中百年流水盡萬事落
花空總帳肩秋月詩樓鏤夜蟲少微何處墮留
恨白楊風

春早

聞鶯纔覺曉閉戶已知晴一帶窓間月斜穿枕
上生暉

和友人

閨門同隱士不出動經時靜閱王維畫閑翻終
脣碁落泉當戶急殘月下窻遲却想從來意譙
周亦自嗤

春愁

寓思本多傷逢春恨更長露霑湘竹淚花墮越
梅粧睡怯交加夢閑傾潑灑觴後庭人不到斜
月上松篁

晚春

花開疑乍富花落似初貧萬物不如酒四時唯
愛春峨峨秦氏髻皎皎洛川神風月應相笑年

年醉病身

題許渾詩卷

江南才子許渾詩字字清新句句竒十斛明珠
量不盡惠休虛作碧雲詞

贈禮佛名者

何用辛勤禮佛名我從無得到真庭尋思首祖
傳心印可是從來讀藏經

殘花

一作于
鄰詩

和煙和露雪離披金蕊紅鬚尚滿枝十日笙歌
一宵夢苧蘿因雨失西施

浣花集卷第三

朝少中下是笑來賣與聖

何用辛懽野物各年終無野匪真或尋思首卧

韻野物各皆

量不盡惠朴盡非罽雲隨

云南木子指戰指字字書濂向台音十換肥耗

賦指軍藉卷

平輜錄良

浣花集卷第四

杜陵京兆

韋

莊

端已

今體詩凡四十首

上元縣

浙西作

南朝三十六英雄角逐興亡盡此中有國有家
皆是夢為龍為虎亦成空殘花舊宅悲江令落
日青山弔謝公止竟霸圖何物在石麟無主卧
秋風

江上逢史館李學士

前年分袂陝城西醉凭征軒日欲低去浪指期

魚必變出門迴首馬空嘶關河自此爲征壘城
闕於今陷戰輦誰謂世途陵是谷燕來還識舊
巢泥

金陵圖

誰謂傷心畫不成畫人心逐世人情君看六幅
南朝事老木寒雲滿故城

謁蔣帝廟

建業城邊蔣帝祠素髯清骨舊風姿江聲似激
秦軍破山勢如匡晉祚危殘雪嶺頭明組練晚
霞簷外簇旌旗金陵客路方流落空祝迴鑿奠

酒卮

聞再幸梁洋

纔喜中原息戰輦又聞天子幸巴西延燒魏闕
非關燕大狩陳倉不爲雞興慶玉龍寒自躍昭
陵石馬夜空嘶遙思萬里行宮夢太白山前月
欲低

王道者

五雲遙指海中央金鼎曾傳肘後方三島路岐
空有月十洲花木不知霜因携竹杖聞龍氣爲
使仙童帶橘香應笑我曹身是夢白頭猶自學

詩狂

陪金陵府相中堂夜宴

滿耳笙歌滿眼花
滿樓珠翠勝吳娃
因知海上神仙窟
只似人間富貴家
繡戶夜攢紅燭市
舞衣晴曳碧天霞
却愁宴罷青蛾散
楊子江頭月半斜

和侯秀才同友生泛舟谿中相招之作

嵇阮相將棹酒船
晚風侵浪水侵舷
輕如控鯉初離岸
遠似乘槎欲上天
雨外鳥歸吳苑樹
鏡中人入洞庭煙
憑君不用迴舟疾
今夜西江月

正圓

贈野童

羨爾無知野性真
亂搔蓬髮笑看人
閑衝暮雨騎牛去
肯問中興社稷臣

代書寄馬

驅馳曾在五侯家
見說初生自渥洼
鬃白似披梁苑雪
頸肥如撲杏園花
休嫌綠綬嘶貧舍
好著紅纓入使衙
穩上雲衢千萬里
年年長踏魏堤沙

題淮陰侯廟

滿把椒漿奠楚祠，碧幢黃鉞舊英威。
能扶漢代成王業，忍見唐民陷戰機。
雲夢去時高鳥盡，淮陰歸日故人稀。
如何不借平齊策，空看長星落賊圍。

送崔郎中往使西川行在

拜書辭玉帳，萬里劔關長。
新馬杏花色，綠袍春草香。
一身朝玉陛，幾日過銅梁。
莫戀壚邊醉，仙宮待侍郎。

潤州顯濟閣曉望

清曉水如鏡，隔江人似鷗。
遠煙藏海島，初日照

揚州地壯孫權氣，雲凝庾信愁。
一蓬何處客，吟凭釣魚舟。

觀浙西府相畋遊

十里旌旗十萬兵，等閑遊獵出軍城。
紫袍日照金鵝鬪，紅旆風吹畫虎獰。
帶箭彩禽雲外落，避鵬寒兔月中驚。
歸來一路笙歌滿，更有仙娥載酒迎。

官莊

江南富民悉以犯酒沒家產，因以此詩諷之。浙帥遂改酒法，不入財產。

誰氏園林一簇煙，路人遙指盡長歎。
桑田稻澤今無主，新犯香醪沒入官。

解維

又解征帆落照中
暮程還過秣陵東
二年辛苦
煙波裏贏得風姿似釣翁

雨霽池上作呈侯學士

鹿巾藜杖葛衣輕
雨歇池邊晚吹清
正是如今
江上好白鱗紅稻紫蓴羹

寓言

爲儒逢世亂吾道欲何之
學劍已應晚歸山
今又遲故人三載別
明月兩鄉悲惆悵
滄江上星
星鬢有絲

哭同舍崔員外

却到同遊地三年一電光
池塘春草在風燭故人亡
祭罷泉聲急齋餘磬韻長
碧天應有恨斜日弔松篁

題姑蘇凌處士莊

一簇林亭返照間
門當官道不曾關
花深遠岸黃鶯鬧
雨急春塘白鷺閑
載酒客尋吳苑寺
倚樓僧看洞庭山
怪來話得仙中事
新有人從物外還

過當塗縣

客過當塗縣停車訪舊遊謝公山有墅李白酒
無樓采石花空發烏江水自流夕陽誰共感寒
鷺立汀洲

江亭酒醒却寄維揚錢客

別筵人散酒初醒江步黃昏雨雪零滿坐綺羅
皆不見覺來紅樹背銀屏

臺城

江雨霏霏江草齊六朝如夢鳥空啼無情最是
臺城柳依舊煙籠十里堤

贈漁翁

草衣荷笠鬢如霜自說家編楚水陽滿岸秋風
吹枳橘遶陂煙雨種菰蔣蘆刀夜鱠紅鱗膩木
甌朝蒸紫芋香曾向五湖期范蠡爾來空闊久
相忘

過揚州

當年人未識兵戈處處青樓夜夜歌花發洞中
春日永月明衣上好風多淮王去後無雞犬煬
帝歸來葬綺羅二十四橋空寂寂綠楊摧折舊
官河

寄右省李起居

已向駕行接鴈行便應雙拜紫薇郎纔聞闕下
徵書急已覺回朝草詔忙白馬似憐朱紱貴綵
衣遙惹御爐香多慙十載遊梁客未換青襟侍
素王

鑷白

白髮太無情朝朝鑷又生始因絲一縷漸至雪
千莖不避佳人笑唯慙稚子驚新年過半百猶
歎未休兵

漳亭驛小櫻桃

一作桃花

當年此樹正花開五馬仙郎載酒來李白已亡

工部死何人堪伴玉山頽

酬吳秀才雪川相送

一葉南浮去似飛楚鄉雲水本無依離心不忍
聞春鳥病眼何堪送落暉摻袂客從花下散棹
舟人向鏡中歸夫君別我應惆悵十五年來識
素衣

對雨獨酌

榴花新釀綠於苔對雨閑傾滿滿盃荷鍾醉翁
真達者卧雲逋客竟悠哉能詩豈是經時策愛
酒元非命世才門外綠蘿連洞口馬嘶應是步

兵來

夏初與侯補闕江南有約同泛淮汴西
赴行朝莊自九驛路先至甬橋補闕由
淮楚續至泗上寢病旬日遽聞捐館迴
首悲慟因成長句四韻弔之

迎駕却過昭義相
州路歸金陵作

已後自浙西遊
汴宋路至陳倉

本約同來謁帝關忽隨川浪去東奔九重聖主
方虛席千里高堂尚倚門世德只應榮伯仲時
名終自付兒孫遙憐月落清淮上寂寞何人弔
旅魂

汴堤行

欲上隋堤舉步遲隔雲烽燧叫非時纔聞破
將休馬又道征遼再出師朝見西來爲過客暮
看東去作浮屍綠楊千里無飛鳥日落空投舊
店基

旅次甬西見兒童以竹槍紙旗戲爲陣
列主人叟曰斯子也三世沒於陣思所
襲祖父讎余因感之

已聞三世沒軍營又見兒孫學戰爭見爾此言
堪慟哭遣予何日望時平

自孟津舟西上雨中作

秋煙漠漠雨濛濛不卷征帆任晚風
百口寄安滄海上一身逃難綠林中
來時楚岸楊花白去日隋堤蓼穗紅
却到故園翻似客歸心迢遞秣陵東

含山店夢覺作

曾爲流離慣別家等閑揮袂客天涯
燈前一覺江南夢惆悵起來山月斜

題貂黃嶺官軍

散騎蕭蕭下太行遠從吳會去陳倉
斜風細雨

江亭上盡日凭欄憶楚鄉

過內黃縣

相州吹角欲斜陽匹馬搖鞭宿內黃
僻縣不容投刺客野陂時遇射鵬郎
雲中粉堞新城壘店後荒郊舊戰場
猶指去程千萬里秣陵煙樹在何鄉

雜感

莫悲建業荆榛滿昔日繁華是帝京
莫愛廣陵臺榭好也曾蕪沒作荒城
魚龍爵馬皆如夢風月煙花豈有情
行客不勞頻悵望古來朝市歎

衰榮

垣縣山中尋李書記山居不遇留題河

次店

白雲紅樹坑嶺東名鳥羣飛古畫中仙吏不知
何處隱山南山北雨濛濛

送人遊并汾

風雨蕭蕭欲暮秋獨携孤劍塞垣遊如今
方南牧莫過陰關第一州

浣花集卷第四

浣花集卷第五

杜陵京兆

韋

莊

端已

今體詩凡二十八首

李氏小池亭十二韻

時在婺州
寄居作

積石亂巉巉庭莎綠不芟小橋低跨水危檻半
依巖花落魚爭唼櫻紅鳥競鷓引泉疏地脉掃
絮積山嵌古柳紅綃織新篁紫綺緘養猿秋嘯
月放鶴夜棲杉枕簟露雲膩池塘海雨鹹語窻
雞逞辨低鼎犬偏饒踏蘚青粘屐攀蘿綠映衫
訪僧舟北渡貫酒日西銜遲客登高閣題詩遶

竹爲鳥
鳴也

小字側書

切銜

小字側書

翠岳家藏何所寶清韻滿琅函

遣興

如幻如泡世多愁多病身亂來知酒聖貧去覺
錢神異國清明節空江寂寞春聲聲林上鳥喚
我北歸秦

婺州和陸諫議將赴闕懷陽羨山居

望闕路仍遠子牟魂欲飛道開燒藥鼎僧寄卧
雲衣故國饒芳草他山挂夕暉東陽雖勝地王
粲奈思歸

江上題所居

故人相別盡朝天苦竹江頭獨閉關落日亂蟬
蕭帝寺碧雲歸鳥謝家山青州從事來偏熟泉
布先生老漸慳不是對花長醕酎永嘉時代不
如閑

婺州屏居蒙右省王拾遺車枉降訪病
中延候不得因成寄謝

三年流落卧漳濱王粲思家拭淚頻畫角莫吹
殘月夜病心方憶故園春自爲江上樵蘇客不
識天邊侍從臣怪得白鷗驚去盡綠蘿門外有
朱輪

將卜蘭芷村居留別郡中在仕

蘭芷江頭寄斷蓬移家空載一帆風伯倫嗜酒
還因亂平子歸田不爲窮避世漂零人境外結
茅依約畫屏中從今隱去應難覓深入蘆花作
釣翁

和陸諫議避地寄東陽進退未決見寄
未歸天路紫雲深暫駐東陽歲月侵入洛聲華
當世重閔周章句滿朝吟開爐夜看黃芽鼎卧
甕閑歌白玉簪讀易草玄人不會憂君心是致
君心

山墅閑題

邈迤前岡歷後岡一川桑柘好殘陽主人饋餉
炊紅黍鄰父携竿釣紫魴靜極却嫌流水鬧閑
多翻笑野雲忙有名不那無名客獨閉衡門避
建康

江上逢故人

前年送我曲江西紅杏園中醉似泥今日逢君
越溪上杜鵑花發鷓鴣啼來時舊里人誰在別
後滄波路幾迷江畔玉樓多美酒仲宣懷土莫
淒淒

旅中感遇寄呈李祕書昆仲

南望愁雲鎖翠微
謝家樓閣雨霏霏
劉楨病後新詩少
阮籍貧來好客稀
猶喜故人天外至
許將孤劍日邊歸
懷鄉不怕嚴陵笑
只待秋風別釣磯

送范評事入關

寥寥門戶寡相親
日日頻來只有君
正喜琴樽長作伴
忽携書劍遠辭羣
傷心柳色離亭見
聒耳蟬聲故國聞
爲報明年杏園客
與留絕艷待終軍

東陽酒家贈別二絕句

送君同上酒家樓
酪酊翻成一笑休
正是落花饒悵望
醉鄉前路莫回頭

天涯方歎異鄉身
又向天涯別故人
明日五更孤店月
醉醒何處淚霑巾

江上村居

本無踪跡戀柴扃
世亂須教識道情
顛倒夢魂愁裏得
擬竒詩句望中生
花綠艷絕栽難好
山爲看多詠不成
聞道漢軍新破使
來仍說近離京

江外思鄉 一作歸

年年春日異鄉悲
杜曲黃鶯可得知
更被夕陽江上岸
斷腸煙柳一絲絲

和鄭拾遺秋日感事一百韻

禍亂天心厭流離
客思傷有家拋上國
無罪謫遐方
負笈將辭越揚帆
欲泛湘避時難駐
足感事易回腸
雅道何銷德妖星
忽耀芒中原初縱
燎下國竟探湯盜
據三秦地兵纏八
水鄉戰塵輕犯關
羽旆遠巡梁自此
修文代俄成講武
場熊羆驅豕鹿犀
象走昆陽御馬迷
新棧宮娥改

舊粧五丁功再覩
八難事難忘鳳引
金根疾兵環玉弩
彊建牙雖可恃摩
壘詎能防霍廟神
遐遠圮橋路杳茫
出師威似虎禦敵
狠如羊眉畫猶思
赤巾裁未厭黃晨
趨鳴鐵騎夜舞挹
瓊觴僭侈彤襜亂
誼呼繡鬢攘但聞
爭曳組詎見學垂
韁鵠印提新篆龍
泉奪曉霜軍威徒
逗撓我武自維揚
負宸勞天眷凝旒
念國章繡旗張畫
獸寶馬躍紅鴛但
欲除妖氣寧思蔽
耿光曉煙生帝里
夜火入春坊鳥怪
巢宮樹狐驕上苑
牆設危終在德視
履豈無祥氣激雷
霆怒神驅岳

瀆忙功高分虎節位下耻龍驤遍命登壇將巡
封異姓王志求扶墜典力未振頽綱漢路閑鵬
鷲雲衢駐驕驍寶裝軍器麗麝衰戰袍香日覩
兵書捷時聞
騎亡人心驚獬豸雀意伺螳螂
上略咸推妙前鋒詎可當紆金光照耀執玉意
藏昂覆鍊非無謂奢華事每詳四民皆組綬九
土墮耕桑飛騎黃金勒香車翠鈿裝八珍羅膳
府五采闔筐牀宴集喧華第歌鍾簇畫櫟永期
傳子姓寧誤犯天狼未覩君除側徒思玉在傍
竄身奚可保易地喜相將國運方夷險天心詎

當作減

測量九流雖暫蔽三柄豈相妨小孽乖躔次中
典繫昊蒼法堯功已普罪已德非涼帝念惟思
理臣心豈自違詔催青瑣客時待紫微郎定難
輸宸筭勝災滅御梁皇恩思蕩蕩睿澤喜洋洋
偃卧雖非晚艱難亦備嘗舜庭招諫鼓漢殿上
書囊儉德遵三尺清朝俟一匡世隨漁父醉身
效接輿狂竄逐同天寶遭罹異建康道孤悲海
滋家遠隔天潢卒歲貧無褐經秋病泛漳似魚
甘去乙比蟹未成筐守道慙無補趨時愧不臧
殷牛常在耳晉豎欲潛盲忸恨山思板懷歸海

欲航角吹魂悄悄笛引淚浪浪亂覺乾坤窄貧
知日月長勢將隨鶴列忽喜遇駕行已報新迴
駕仍聞近納隍文風銷劍楯禮物換旂裳紫闥
重開序青衿再設庠黑頭期命爵頰尾尚憂魴
吳坂嘶騏驥岐山集鳳皇詞源波浩浩諫署玉
鏘鏘飼雀曾傳慶烹蛇詎有殃弋弓禪勁鏃匣
劍淬神鋸諤諤寧慙直堂堂不謝張曉風趨建
禮夜月直文昌去國時雖久安邦志不常良金
鑪自躍美玉櫝難藏北望心如旆西歸律變商
跡隨江燕去心逐塞鴻翔晚翠籠桑塢斜暉掛

竹堂路愁千里月田愛萬斯箱伴釣歌前浦隨
樵上遠崗鷺眠依晚嶼鳥浴上枯楊驚夢綠歌
枕多吟爲倚廊訪僧紅葉寺題句白雲房帆外
青楓老樽前紫菊芳夜燈銀耿耿曉露玉瀼瀼
異國慙傾蓋歸途俟併糧身雖留震澤心已過
雷塘執友知誰在家山各已荒海邊登桂檝煙
外泛雲檣巢樹禽思越嘶風馬戀羌寒聲愁聽
杵空館厭聞蜚望闕飛華蓋趨朝振玉璫米慙
無蕙苴麵喜有枕榔話別心重結傷時淚一滂
佇歸蓬島後綸詔潤青絳

夢入關

夢中乘傳過關亭南望蓮峯簇簇青馬上正吟
歸去好覺來江月滿前庭

送人歸上國

送君江上日西斜泣向江邊滿樹花若見青雲
舊相識爲言流落在天涯

聞春鳥

雲晴春鳥滿江村還似長安舊日聞紅杏花前
應笑我我今顛顛亦羞君

櫻桃樹

記得初生雪滿枝和蜂和蝶帶花移如今花落
遊蜂去空作主人惆悵詩

獨鶴

夕陽灘上立徘徊紅蓼風前雪翅開應爲不知
棲宿處幾迴飛去又飛來

新栽竹

寂寞堦前見此君遶欄吟罷却沾巾異鄉流落
誰相識唯有鼓篋似主人

稻田

綠波春浪滿前陂極目連雲穉稭肥更被鷺鷥

澠花集五
千點雪破煙來入畫屏飛

庭前菊

爲憶長安爛熳開我今移爾滿庭栽紅蘭莫笑
青青色曾向龍山泛酒來

燕來

去歲辭巢別近隣今來空訝草堂新花間對語
應相問不是村中舊主人

倚柴關

杖策無言獨倚關如癡如醉又如閑孤吟盡日
何人會依約前山似故山

題七步廊

席門無計那殘陽更接簷前七步廊不羨東都
丞相宅每行吟得好篇章

語松竹

庭前芳草綠於袍堂上詩人欲二毛多病不禁
秋寂寞雨松風竹暮騷騷

澠花集卷第五

或前芳草綠，故所堂上結。入俗二手多，麻不禁。

晴林竹

水畔字每許，今野我蘇章。

孤門無惜味，爽野更對蒼。前子走瀨，不羨東瀛。

賦子走瀨

浣花集卷第六

杜陵京兆

韋

莊

端已

今體詩凡十七首

不出院楚公

自三衢至江西作

一自禪關閉，心猿日漸馴。不知城郭路，稀識市朝人。履帶塔前雪，衣無寺外塵。却嫌山翠好，詩客往來頻。

江邊吟

江邊烽燧幾時休，江上行人雪滿頭。誰信亂離花不見，只應惆悵水東流。陶潛政事千盃酒，張

翰生涯一葉舟若有片帆歸去好
可堪重倚仲宣樓

江南送李明府入關

兩花煙柳傍江村流落天涯酒一罇
分首不辭多下淚迴頭唯恐更消魂
我爲孟館三千客君繼寧王五代孫
正是中興磐石重莫將顛顛入都門

送福州王先輩南歸

豫章城下偶相逢自說今方遇至公
八韻賦吟梁苑雪六銖衣惹杏園風
名標玉籍仙壇上家

寄閩山畫障中明日一盃何處別
綠楊煙岸雨濛濛

夜雪泛舟遊南溪

大江西面小溪斜入竹穿松似若耶
兩岸巖風吹玉樹一灘明月曬銀砂
因尋野渡逢漁舍更泊前灣上酒家
去去不知歸路遠棹聲煙裏獨嘔啞

江行西望

西望長安白日遙半年無事駐蘭橈
欲將張翰秋江雨畫作屏風寄鮑昭

銅儀

銅儀一夜變葭灰暖律還吹嶺上梅已喜漢官
今再覩更驚堯曆又重開窓中遠岫青如黛門
外長江綠似苔誰念閉關張仲蔚滿庭春雨長
蒿萊

含香

含香高步已難陪鶴到清霄勢未迴遇物旋添
芳草句逢春寧滯碧雲才微紅幾處花心吐嫩
綠誰家柳眼開却去金鑿爲近侍便辭鷗鳥不
歸來

春雲

春雲春水兩溶溶倚郭樓臺晚翠濃山好只因
人化石地靈曾有劍爲龍官辭鳳闕頻經歲家
住峨眉第幾峯王粲不知多少恨夕陽吟斷一
聲鍾

雲散

雲散天邊落照和關關春樹鳥聲多劉伶避世
唯沈醉甯戚傷時亦浩歌已恨歲華添皎鏡更
悲人事逐頽波青雲自有鷓鴣待莫說他山好
薜蘿

袁州作

家家生計只琴書一郡清風似魯儒山色東南
連紫府水聲西北屬洪都煙霞盡入新詩卷郭
邑閑開古畫圖正是江村春酒熟更聞春鳥勸
提壺

題袁州謝秀才所居

主人年少已能詩更有松軒掛夕暉芳草似袍
連徑合白雲如鳥傍簷飛但將竹葉消春恨莫
遣楊花上客衣若有前山好煙雨與君吟到暝
鍾歸

謁巫山廟

亂猿啼處訪高唐路入煙霞草木香山色未能
忘宋玉水聲猶似哭襄王朝朝暮暮陽臺下為
雨為雲楚國亡惆悵廟前無限柳春來空闔畫
眉長

鷓鴣

南禽無侶似相依錦翅雙雙傍馬飛孤竹廟前
啼暮雨汨羅祠畔弔殘暉秦人只解歌為曲越
女空能畫作衣懊惱澤家非有恨年年長憶鳳

城一作皇歸

懊惱澤家鷓鴣之音也

浣花集六
四
宿蓬船

夜來江雨宿蓬船，卧聽淋鈴不忍眠。
却憶紫微情調逸，阻風中酒過年年。

送李秀才歸荆溪

八月中秋月正圓，送君吟上木蘭船。
人言格調勝玄度，我愛篇章敵浪仙。
晚渡去時衝細雨，夜灘何處宿寒煙。
楚王宮去陽臺近，莫倚風流滯少年。

洪州送西明寺省上人遊福建

記得初騎竹馬年，送師來往御溝邊。
荆榛已失當時路，槐柳全無舊日煙。
遠自嵇山遊楚澤，又從廬岳去閩川。
新春闕下應相見，紅杏花中覓酒仙。

浣花集卷第六

西山
公蠶岳去閩川
禱春闈下飄眊良
珠杏芥中負
當却祖賦咻全
無善日甄
豈自蘇山
並焚墨又

浣花集卷第七

杜陵

京兆

韋

莊
端已

今體詩凡二十六首

建昌渡暝吟

月照臨官渡鄉情獨浩然
鳥棲彭蠡樹月上建昌船
市散漁翁醉樓深賈客眠
隔江何處笛吹斷綠楊煙

歲除對王秀才作

我惜今宵促君愁玉漏頻
豈知新歲酒猶作異鄉身
雪向寅前凍花從子後春
到明追此會俱

是隔年人

酒渴愛江清

酒渴何方療江波一
清瀉甌如練色漱齒作
泉聲味帶他山雪光含
白露精只應千古後長
稱伯倫情

和李秀才郊墅早春吟興十韻

暖律變寒光東君景漸長
我悲遊海嶠君說住
柴桑雪色隨高嶽冰聲
陷古塘草根微吐翠梅
朶半含霜酒市多逋客
漁家足夜航匡廬雲傍
屋彭蠡浪衝床綠擺楊
柳嫩紅挑菜甲香鳳皇
城已盡鸚鵡賦應狂佇
見龍辭沼寧憂鴈失行
不應雙劍氣長在斗牛
傍

泛鄱陽湖

四顧無邊鳥不飛大波驚
隔楚山微紛紛雨外
靈均過瑟瑟雲中帝子
歸迸鯉似梭投遠浪小
舟如葉傍斜暉鴟夷去
後何人到愛者雖多見
者稀

黃藤山下聞猿

黃藤山下駐歸程一夜號
猿弔旅情入耳便能
生百恨斷腸何必待三
聲穿雲宿處人難見望

月啼時免正明好笑五陵年少客壯心無事也
沾纓

章江作

杜陵歸客正徘徊玉笛誰家叫落梅之子棹從
天外去故人書自日邊來楊花慢惹霏霏雨竹
葉閑傾滿滿盃欲問維揚一作旌陽舊風月一江紅樹
亂猿哀

南遊富陽江中作

南去又南去此行非自期一帆雲作伴千里月
相隨浪跡花應笑衰容鏡每知鄉園不可問禾

黍正離離

饒州餘干縣琵琶洲有故韓賓客宣城
裴尚書修行李侍郎舊居遺址猶存客
有過之感舊因以和吟

琵琶洲近斗牛星鸞鳳曾於此放情已覺地靈
因昴降更聞川媚有珠生一灘紅樹留佳氣萬
古清絃續政聲戟戶盡移天上去里人空說舊
簪纓

九江逢盧負外

前年風月宿琴堂大媚仙山近帝鄉別後幾沾

新雨露亂來猶記舊篇章陶潛豈是銅符吏田
鳳終爲錦帳郎其怪相逢倍惆悵九江煙月似
瀟湘

南昌晚眺

一作興

南昌城郭枕江煙章水悠悠浪拍天芳草綠遮
仙尉宅落霞紅襯賈人船霏霏閣上千山雨嘒
嘒雲中萬樹蟬怪得地多章句客庾家樓在斗
牛邊

衢州江上別李秀才

千山紅樹萬山雲把酒相看日又曛一曲離歌

兩行淚更知何地再逢君

湘中作

千重煙樹萬重波因便何妨弔汨羅楚地不知
秦地亂南人空怪北人多臣心未肯教遷鼎天
道還應欲止戈否去秦來終可待夜寒休唱飯
牛歌

桐廬縣作

錢塘江盡到桐廬水碧山青畫不如白羽鳥飛
嚴子瀨綠蓑人釣季鷹魚潭心倒影時開合谷
口閑雲自卷舒此境只應詞客愛投文空弔木

玄虛

東陽贈別

繡袍公子出旌旗送我搖鞭入翠微
大抵行人難訴酒就中辭客易沾衣
去時此地題橋去歸日何年佩印歸
無限別情言不得回看谿柳恨依依

寄湖州舍弟

半年江上愴離襟把得新詩喜又吟
多病似逢秦氏藥久貧如得顧家金
雲煙但有穿楊志塵土多無作吏心
何況別來詞轉麗不愁明代少

知音

信州西三十里山名仙人城下有月巖
山其狀秀拔中有山門如滿月之狀余
因行役過其下聊賦是詩

驅車過閩越路出饒陽西
仙山翠如畫簇簇生
虹蜺羣峯若侍從
衆阜如嬰提巖巒互吞吐
嶺岫相追携中有月輪滿
皎潔如圓珪玉皇恣遊
覽到此神應迷常娥曳霞帔
引我同攀躋騰騰上天半
玉鏡懸飛梯瑤池何悄悄
鸞鶴煙中棲回頭望塵世
露下寒淒淒

婺州水館重陽日作

異國逢佳節憑高獨苦吟一盃今日醉酒一作萬里
故園心水館紅蘭合山城紫菊深白衣雖不至
鷗鳥自相尋

避地越中作

避世移家遠天涯歲已周豈知今夜月還是去
年愁露果珠沈水風螢燭上樓傷心潘騎省華
髮不禁秋

撫州江口雨中作

江上閑衝細雨行滿衣風灑綠荷聲金駟掉尾

橫鞭望猶指廬陵半日程

信州谿岸夜吟作

夜倚臨谿店懷鄉獨苦吟月當山頂出星倚水
湄沉霧氣漁燈冷鍾聲谷寺深一城人悄悄琪
樹宿仙禽

訪潯陽友人不遇

不見安期悔上樓寂寥人對鷺鷥愁蘆花雨急
江煙暝何處潺潺獨棹舟

東林寺再遇僧益大德

見師初事懿皇朝三殿歸來白馬驕上講每教

浣花集卷第七
傾國聽承恩偏得內官饒當時可愛人如畫今日相逢鬢已凋若向君門逢舊友爲傳音信到
缺字
雲霄

西塞山下作

西塞山前水似藍亂雲如絮滿澄潭孤峯漸映
湓城北片月斜生夢澤南爨動曉煙烹紫蕨露
和香蒂摘黃柑他年却棹扁舟去終傍蘆花結
一菴

齊安郡

耳彌棹齊安郡孤城百戰殘傍村林有虎帶郭縣

無官暮角梅花怨清江桂影寒黍離綠底事撩
我起長歎

夏口行寄婺州諸弟

迴頭煙樹各天涯婺女星邊遠寄家盡眼楚波
連夢澤滿衣春雪落江花雙雙得伴爭如鴈一
一歸巢却羨鷗誰道我隨張博望悠悠空外泛
仙槎

浣花集卷第七

山對

一韻莫休美難精正身到聖道無私空不妄
重夢紫微春雲紫玉芬雙文雙林林平吹烈一
歐顛獸樹今天賦笑女星變紫宇家盡如焚火

夏口寄寄葉限清涼

舟賦尋燭

無官暮色林林然青玉林林寒黍齋懸孤市琳

浣花集卷第八

杜陵京兆

韋

莊 端已

今體詩凡九首

南省伴直

甲寅年自江南到京後作

文昌二十四仙曹盡倚紅簷種露桃一洞煙霞
人迹少六行槐柳鳥聲高星分夜彩寒侵帳蘭
惹春香綠映袍何事愛留詩客宿滿庭風雨竹
蕭騷

鄠杜舊居二首

却到山陽事事非谷雲谿鳥尚相依阮咸貧去

田園盡向秀歸來父老稀
秋雨幾家紅稻熟野塘
何處錦鱗肥年年爲獻
東堂策長是蘆花別釣磯

一徑尋村渡碧谿稻花香
澤水千畦雲中寺遠磬
難識竹裏巢深鳥易迷
紫菊亂開連井合紅榴
初綻拂簷低歸來滿把
如澆酒何用傷時歎鳳兮

寄江南諸弟

萬里逢歸鴈鄉書忍淚封
吾身不自保爾道各何
從性拙唯多蹇家貧半
爲慵祇思谿影上卧

看玉華峯

投寄舊知

却將顛顛入都門自喜青霄足
故人萬里有家留百越十年
無路到三秦摧殘不是當時
貌流落空餘舊日貧多謝青
雲好知己莫教歸去重沾巾

癸丑年下第獻新先輩

五更殘月省墻邊絳旆蜺
旌卓曉煙千炬火中鷲
出谷一聲鐘後鶴冲天
皆乘駿馬先歸去獨被
羸童笑晚眠對酒暫時
情豁爾見花依舊涕

浣花集卷第八
潛然未酬闕澤傭書債猶欠君平賣卜錢何事
欲休休不得來年公道似今年

題汧陽縣馬跑泉李學士別業

木滿寒塘菊滿籬籬籬邊無限彩禽飛西園夜雨
紅櫻熟南畝清風白稻肥草色自留閑客住泉
聲如待主人歸九霄岐路忙於火肯戀斜陽守
釣磯

絳州過夏留獻鄭尚書

朝朝沉醉引金船不覺西風滿樹蟬光景暗消
銀燭下夢魂長寄玉輪邊因循每被時流誚奮

發須由國士憐明月客腸何處斷綠槐風裏獨
揚鞭

綏州作

雕陰無樹木難流雉堞連雲古帝州帶雨晚馳
鳴遠戍望鄉孤客倚高樓明妃去日花應笑蔡
琰歸時鬢已秋一曲單于暮烽起扶蘇城上月
如鉤

浣花集卷第八

浣花集卷第九

杜陵

京兆

韋

莊 端已

今體詩凡十二首

與東吳生相遇

及第後
出關作

十年身事各如萍
白首相逢淚滿纓
老去不知花有態
亂來唯覺酒多情
貧疑陋巷春偏少
貴想豪家月最明
且一作獨對一樽開口笑
未衰應見泰階平

庭前桃

曾向桃源爛漫遊
也同漁父泛仙舟
皆言洞裏

千株好未勝庭前一樹幽帶露似垂湘女淚無
言如伴息嬌愁五陵公子饒春恨莫引香風上
酒樓

丙辰年鄜州遇寒食城外醉吟七言五
首

滿街楊柳綠絲煙畫出清明二月天好是隔簾
花樹動女郎撩亂送鞦韆

淮陰寒食足遊人金鳳羅衣溼麝薰腸斷入城
芳草路淡紅香白一羣羣

開元坡日初斜拜掃歸來走鈿車可惜數株

紅艷好不知今夜落誰家

馬驕風疾玉鞭長過去唯留一陣香閑客不須
燒破眼好花皆屬富家郎

雨絲煙柳欲清明金屋人閑煖鳳笙永日一作晝迢
迢無一事隔街聞築氣毬聲

宜君一作春縣北卜居不遂留題王秀才別
墅二首

本期同此卧林丘楮拙爐前擁布裘何事却騎
羸馬去白雲紅樹不相留

明月嚴霜撲阜貂羨君高卧正逍遥門前積雪

深三尺火滿紅爐酒滿瓢

鄜州留別張負外

江南相送君山下塞北相逢朔漠中一作楚故人
皆是夢十年陳事只如風莫言身世他時異且
喜琴樽數日同惆悵却愁明日別馬嘶山店雨
濛濛

病中聞相府夜宴戲贈集賢盧學士

滿筵紅蠟照香鈿一夜歌鍾欲沸天花裏亂飛
金錯落月中爭認繡連乾罇前莫話詩三百醉
後寧辭酒一千無那兩三新進士風流長得飲

徒憐

出關

馬嘶煙岸柳陰斜東去一作回首關山路轉賒到處因
循緣嗜酒一生惆悵爲判花危時祇合身無著
白日那堪事有涯正是灞陵春酎綠仲宣何事
獨辭家



一
女

浣花集卷第九

浣花集卷第十

杜陵

韋

莊

端已

今體詩凡六首

過樊川舊居

時在華州駕前奉使入蜀作

却到樊川訪舊遊夕陽衰草杜陵秋應劉去後
苔生閣稽阮歸來雪滿頭能說亂離惟有燕解
偷閑暇不如鷗千桑萬海無人見橫笛一聲空
淚流

長安舊里

滿月墻匡春草深傷時傷事更傷心車輪馬跡

今何在十二玉樓無處尋

過漢陂懷舊

辛勤曾寄玉峯前一別雲溪二十年三徑荒涼
迷竹樹四鄰凋謝變桑田漢陂可是當時事紫
閣空餘舊日煙多少亂離無處問夕陽吟罷涕
潸然

汧陽間

一作汧陽縣閣

汧水悠悠去似緝遠山如畫翠眉橫僧尋野渡
歸吳嶽鴈帶斜陽入渭城邊靜不收蕃帳馬地
貧惟賣隴山鷄牧童何處吹羌笛一曲梅花出

塞聲

焦崖閣

李白曾歌蜀道難長聞白日上青天今朝夜過
焦崖閣始信星河在馬前

雞公憤

去襄城縣
二十里

石狀雖如憤山形可類雞向風疑欲鬪帶雨似
聞啼蔓織青籠合松長翠羽低不鳴非有意爲
怕客奔齊

浣花集卷第十終

明鈔藍格浣花集十卷杭州書友楊耀松守未
半葉十行二十六字卷末有朱子濬記闌外有江陰
朱氏之房六字疑即朱氏鈔本開卷郡望題作杜陵
即與通行本異卷中增改數十字注出李鈔外如
其所出根源較古惟補遺卷內只彩牋歌詠白牡丹
二首當是正法以前相傳之本如此今序刻而增由
法入補輯也卷首有覃履及嘉興方氏之快珍藏二
印卷末有元祺監古季白真賞二印不知為何人所
以竝考丁巳十二月初七日校畢日記之增相
據改則朱氏曾刻是集此流傳乃絕少何也明人即
據刻本重鈔是當時三稀見矣前跋既失附志於此以辨

韋端已補遺

少年行

五陵豪客多買酒黃金觥醉下酒家樓美人雙
翠幘揮劍邯鄲市走馬梁王苑樂事殊未央年
華已云晚

閨月

明月照前除煙華蕙蘭濕清風行處來白露寒
蟬急美人情易傷暗上紅樓立欲言無處言俱
向姮娥泣

閨怨

戚戚彼何人明眸利於月啼粧曉不乾素面凝
香雪良人去淄右鏡破金簪折空藏蘭蕙心不
忍琴中說

平陵老將

白羽金僕姑腰懸雙轆轤前年葱嶺北獨戰雲
中匹馬塞垣老一身如鳥孤歸來辭第宅却
占平陵居

乞彩牒歌

朱承爵補遺

浣花溪上如花客綠闇紅藏人不識留得溪頭
瑟瑟波潑成紙上猩猩色手把金刀裁彩雲有

時剪破秋天碧不使紅霓段段飛一時驅上丹
霞壁蜀客才多染不供卓文醉後開無力孔雀
銜來向日飛翩翩壓折黃金翼我有歌詩一千
首磨礪石山岳羅星斗開卷長疑雷電驚揮毫只
怕龍蛇走班班布在時人口滿軸松花都未有
人間無處買煙霞須知得自神仙手也知價重
連城璧一紙萬金猶不惜薛濤昨夜夢中來殷
勤勸向君邊覓

上春詞

曠曠赫日東方來禁城煙煖蒸青苔金樓美人

花屏開晨粧未罷車聲催幽蘭報暖紫芽拆天
花愁艷蝶飛迴五陵年少惜花落酒濃歌極翻
如哀四時輪環終又始百年不見南山摧遊人
陌上騎生塵顏子門前吹死灰

擣練篇

月華吐艷明燭燭青樓婦唱擣衣曲白袷絲光
織魚目菱花綬帶鴛鴦簇臨風縹緲疊秋雪月
下丁冬擣寒玉樓蘭欲寄在何鄉憑人與繫征
鴻足

長安春

長安二月多香塵六街車馬聲麟麟家家樓上
如花人千枝萬枝紅艷新簾間笑語自相問何
人占得長安春長安春色本無主古來盡屬紅
樓女如今無奈杏園人駿馬輕車擁將去

贈峨眉山彈琴李處士

識者咸云數百歲有常
建贈詩云

峨眉山下能琴客似醉似狂人不測何須見我
眼偏青未見我身頭已白茫茫四海本無家一
片愁雲颺秋碧壺中醉卧日月明一作長世上長遊
天地窄晉朝叔夜舊相知蜀郡文君小來識後
生常建彼何人贈我篇章苦雕刻名卿名相盡

知音遇酒遇琴無間隔如今世亂獨脩然天外
鴻飛招不得余今正泣楊朱淚八月邊城風刮
地霓旌絳旆忽相尋爲我尊前橫綠綺一彈猛
雨隨手來再彈白雪連天起淒淒清清松上風
咽咽幽幽隴頭水吟蜂遶樹去不來別鶴引鷓
飛又止錦鱗不動惟側頭白馬仰聽空豎耳廣
陵故事無人知古人不說今人疑子期子野俱
不見烏啼鬼哭空傷悲坐中詞客悄無語簾外
月華庭欲午爲君吟作聽琴歌爲君留名係仙
譜

南陽小將張彥破口鎮稅人塲射虎歌
海內昔年狎太平橫目穰穰何崢嶸天生天殺
豈天怒忍使朝朝餵猛虎關東驛路多丘荒行
人最忌稅人塲張彥雄特制殘暴見之叱起如
叱羊鳴弦霹靂越幽阻往往依林猶抵拒草際
旋看委錦茵腰間不更一作見抽白羽老饕已斃衆
雛恐童稚揶揄皆自勇忠良効順勢亦然一劍
猜狂敢輕動有文有武方爲國不是英雄伏不
得試徵張彥作將軍幾箇將軍願策勲

雜體聯錦

攜手重攜手夾江金線柳江上柳能長行人戀
尊酒尊酒意何深爲郎歌玉簪玉簪聲斷續鈿
軸鳴雙轂雙轂去何方隔江春樹綠樹綠酒旗
高淚痕沾綉袍袍縫紫鵝濕重持金錯刀錯刀
何燦爛使我腸干斷腸斷欲何言簾動眞珠繁
眞珠綴秋露秋露沾金盤金盤湛瓊液仙子無
歸跡無跡又無言海煙空寂寂寂寂古城道馬
嘶芳岸草岸草接長堤長堤人解携解携忽已
久緬邈空回首回首隔天河恨唱蓮塘歌蓮塘
在何許日暮西山雨

撫盈歌

鳳縠兮鴛綃霞䟽兮綺寮玉庭兮春畫金屋兮
秋宵愁瞳兮月皎笑頰兮花嬌羅輕兮濃麝室
煖兮香椒鑿輿去兮蕭屑七絲斷兮沈寥主父
卧兮漳水君王幸兮雲輶鉛華窈窕兮穠姿棠
公肸蠁兮靡依翠華長逝兮莫追晏相望門兮
空悲

歲晏同左生作

歲暮鄉關遠天涯手重携雪埋江樹短雲壓夜
城低寶瑟湘靈怨清砧杜魄啼不須臨皎鏡年

易淒淒

秋霽晚景

秋霽禁城晚六街煙雨殘
墻頭山色健林外鳥聲歡
翹日樓臺麗清風劍佩寒
玉人襟袖薄斜凭翠闌干

靈一作虛席

一閉香閨後羅衣盡施僧
鼠偷筵上果蛾撲帳前燈
土蝕釵無鳳塵生鏡少菱
有時還影響花葉曳香繒

舊居

芳草又芳草故人楊子家
青雲容易散白日等閑斜
皓質留殘雪香魂逐斷霞
不知何處笛一夜叫梅花

邊上逢薛秀才話舊

前年同醉武陵亭絕倒閑譚坐到明
也有絳唇歌白雪更憐紅袖奪金觥
秦雲一散如春夢楚市千燒作故城
今日皤然對芳草不勝東望涕交橫

和人春暮書事寄崔秀才

半掩朱門白日長晚風輕墮落梅粧
不知芳草

情何恨只怪遊人思易傷纔見早春鶯出谷已
驚新夏鶯巢梁相逢只賴如澆酒一曲狂歌入
醉鄉

使院黃葵花

薄粧新着澹黃衣對捧金爐侍醮遲向月似矜
傾國貌倚風如唱步虛詞乍開檀炷疑聞語試
與雲和必解吹爲報同人看來好不禁秋露即
離披

咸陽懷古

城邊人倚夕陽樓城上雲凝萬古愁山色不知

秦苑廢水聲空傍漢宮流李斯不向倉中悟一作死
徐福應無物外遊莫怪楚吟偏斷骨野煙蹤跡
似東周

和同年韋學士華下途中見寄

綠楊城郭雨淒淒過盡千輪與萬蹄送我獨遊
三蜀路羨君新上九霄梯馬驚門外山如活花
笑尊前客似泥正是清和好時節不堪離恨劍
門西

江臯贈別

金管多情恨解携一聲歌罷客如泥江亭繫馬

綠楊短野岸維舟春草齊
帝子夢魂煙水闊
謝公詩思碧雲低
風前不用頻揮手
我有家山白日西

奉和左司郎中春物暗度感而成章

纔喜新春已暮春
夕陽吟殺倚樓人
錦江風散霏霏雨
花市香飄漠漠塵
今日尚追巫峽夢
少年應遇洛川神
有時自患多情病
莫是生前宋玉身

奉和觀察郎中春暮憶花言懷見寄四韻之什

天畔峨眉簇簇青
楚雲何處隔重扃
落花帶雪埋芳草
春雨和風濕畫屏
對酒莫辭衝暮角
望鄉誰解倚高亭
惟君信我多惆悵
只願陶陶不願醒

傷灼灼

灼灼蜀之麗人也近聞貧且老殂於成都酒市中因以四韻中之

嘗聞灼灼麗於花
雲髻盤時未破瓜
桃臉曼長橫綠水
玉肌香膩透紅紗
多情不住神仙界
薄命曾嫌富貴家
流落錦江無處問
斷魂飛作碧天霞

漢州

此儂初到漢州城郭邑樓臺觸目驚松桂影中
旌旆色芰荷風裏管絃聲人心不似經離亂時
運還應却太平十日醉眠金鴈驛臨岐無限臉
波橫

長安清明

早是傷春夢雨天可堪芳草更芊芊內官初賜
清明火上相閑分白打錢紫陌亂嘶紅叱撥綠
楊高映英華作影畫鞦韆遊人記得承平事暗喜風光
似昔年

悼亡姬三首

鳳去鸞歸不可尋十洲仙路彩雲深若無少女
花應老爲有姮娥月易沉竹葉豈能消積恨丁
香空解結同心湘江水闊蒼梧遠何處相思弄

舜琴

獨吟以下四首悼亡姬作

默默無言惻惻悲閑吟獨傍菊花籬只今已作
經年別此後知爲幾歲期開篋每尋遺念物倚
樓空綴悼亡詩夜來孤枕空腸斷窻月斜輝夢

覺時

悔恨

六七年來春又秋也同歡笑也同愁纔聞及第
心先喜試說求婚淚便流幾爲妒來頻斂黛每

按七巨指獨吟悔恨等序
舊居四首而言

思閑事不梳頭如今悔恨將何益腸斷千休與
萬休

下邳感舊

昔爲童稚不知愁竹馬閑乘遶縣遊曾爲看花
偷出郭也因逃學暫登樓招他邑客來還醉僂
得先生去始休今日故人無處問夕陽衰草盡
荒丘

塗次逢李氏兄弟感舊

御溝西面朱門宅記得當時好弟兄曉傍柳陰
騎竹馬夜隈燈影弄先生巡街趁蝶衣裳破上

屋探雛手脚輕今日相逢俱老大憂家憂國盡
公卿

龍潭 一作僧應物詩

激石懸流雪滿灣九龍潛處野雲閑欲行甘雨
四天下且隱激潭一頃間浪引浮槎依北岸波
分晚日見東山垂髯儻遇穆王駕閩苑周遊應
未還 一作回瞻四面如看畫
須信遊人不欲還

飲散呈主人

夢覺笙歌散空堂寂寞秋更聞城角弄煙雨不
勝愁

一作漸收雷
雷九峰下

即事

亂世時偏促陰天日易昏無言搔白首憔悴倚
東門

勉兒子

養爾逢多難常真學已遲辟疆爲上相何必待
從師

贈姬人

莫恨紅裙破休嫌白屋低請看京與洛誰在舊
香閨

春愁

自有春愁正斷魂不堪芳草思王孫落花寂寂
黃昏雨深院無人獨倚門

搖落

搖落愁天酒易醒悽悽長是別離情黃昏倚柱
不歸去腸斷綠荷風雨聲

令狐亭

若非天上神仙宅須是人間將相家想得當時
好風月管絃吹殺後庭花

江上別李秀才

前年相送灞陵春今日天涯各避秦莫向尊前

惜沈醉與君俱是異鄉人

姬人養蠶

昔年愛笑蠶家婦今日辛勤自養蠶仍道不愁
羅與綺女郎初解織桑籃

長干塘別徐茂才

亂離時節別離輕別酒應須滿滿傾纔喜相逢
又相送有情爭得似無情

白牡丹

閨中莫妒新妝婦陌上須慚傅粉郎昨夜月明
渾似水入門唯覺一庭香

多情

萬首絕句一作多情
作古離別

一生風月供惆悵到處煙花恨別離止竟多情
何處好少年長抱長年悲

憫耕者

何代何王不戰爭盡從離亂見清平如今暴骨
多於土猶點鄉兵作戍兵

壺關道中作

處處兵戈路不通却從山北去江東黃昏欲到
壺關寨匹馬寒嘶野草中

題酒家

酒綠花紅客愛詩
落花春岸酒家旗
尋思避世爲逋客
不醉長醒也是癡

殘花

江頭沉醉泥斜暉
却向花前慟哭歸
惆悵一年春又去
碧雲芳草兩依依

寄舍弟

每吟富貴他人合
不覺沈瀾又濕衣
萬里日邊鄉樹遠
何年何路得同歸

僕者楊金

半年辛苦葺荒居
不獨單寒腹亦虛
努力且爲

田舍客
他年爲爾覓金魚

春陌二首

滿街芳草卓香車
仙子門前白日斜
腸斷東風各回首
一枝春雪凍梅花
嫩煙輕染柳絲黃
勾引花枝笑凭牆
馬上王孫莫回首
好風偏逐羽林郎

中酒

南鄰酒熟愛相招
蘸甲傾來綠滿瓢
一醉不知三日事
任他童穉作漁樵

暴雨

江村入夏多雷雨曉作狂霖晚又晴波浪不知
深幾許南湖今與北湖平

晏起

邇來中酒起常遲卧看南山改舊詩開戶日高
春寂寂數聲啼鳥上花枝

幽居春詩

綠映紅藏江上村一聲雞犬似仙源閉門盡日
無人到翠羽春禽滿樹喧

思歸引

越鳥南翔鴈北飛兩鄉雲路各言歸如何我是

飄飄者獨向江頭戀釣磯

與小女

見人初解語嘔啞不肯歸眠戀小車一夜嬌啼
緣底事爲嫌衣少縷金花

虎跡

白額頻頻夜到門水邊蹤跡漸成群我今避世
棲巖穴巖穴如何又見君

貲酒不得

停樽待爾怪來遲手挈空瓶罷罷歸滿面春愁
消不得更看溪鷺寂寥飛

得故人書

正向溪頭自采蘇青雲忽得故人書殷勤問我
歸來否雙闕而今畫不如

洪州送僧遊福建

八月風波似鼓鼙可堪波上各東西殷勤早作
歸來計莫戀猿聲住建溪

聞迴戈軍

上將鏖兵旋翠華巡幸已三年營中不用
栽楊柳願戴儒冠爲控弦

南鄰公子

南鄰公子夜歸聲數炬銀燈隔竹明醉凭馬鬃
扶不起更邀紅袖出門迎

憶小女銀娘

睦州江上水門西蕩漿揚帆各解携今日天涯
夜深坐斷腸偏憶阿銀犁

女僕阿狂

念爾辛勤歲已深亂離相失又相尋他年待我
門如市報爾千金與萬金

河清縣河亭

由來多感莫憑高竟日衷腸似有刀人事任成

陵與谷大河東去自滔滔

鍾陵夜闌作

鍾陵風雪夜將深坐對寒江獨苦吟流落天涯誰見問少卿應識子卿心

校李鈔本一過次第都同補遺惟分為六卷耳補

遺多楊氏效一首錄之左方以卯十月四日增相

韋端已補遺

悼楊氏妓琴絃

魂歸寥廓魄歸煙只任人間十八年昨日施僧裙帶上斷腸猶繫琵琶絃

詩集卷第一

莆田 徐寅 昭夢

五言律詩

釣臺

金門誰奉詔碧岸獨垂鉤舊友祇樵叟新交惟野鷗嘉名懸日月深谷化陵丘便可招巢父長川好飲牛

旅次寓題

胡為名利役來往老關河白髮隨梳少青山入夢多途窮憐抱疾世亂耻登科却起漁舟念春

風釣綠波

○ 贈嚴司直

承家居闕下避世出關東有酒劉伶醉無兒伯
道窮新詩吟閣賞舊業釣臺空雨雪還相訪心
懷與我同

○ 贈東方道士

葫蘆窻畔挂是物在其間雪色老人鬢桃花童
子顏祭星秋卜日採藥曉登山舊放長生鹿時
銜瑞草還

○ 題僧壁

香廚流瀑布獨院鎖孤峯紺髮青螺長文茵紫
豹重卯枯皆化燕蜜老却成蜂明月留人宿秋
聲夜著松

○ 和人經隋唐間戰處

孤軍前度戰一敗一成功卷旆早歸國卧屍猶
臂弓草間腥半在沙上血殘紅傷鬼何為者五
湖垂釣翁

○ 追和常建歎王昭君

紅顏如朔雪日爍忽成空淚盡黃沙雨塵消白
草風君心爭不悔恨思妾恨竟何窮願化南飛燕年

年入漢宮

○ 贈董先生

壽歲過於百時間到上京餐松雙鬢嫩絕粒四
支輕雨雪思中嶽雲霞夢赤城來年期受籙何
處待先生

○ 河流

洪流盤砥柱淮濟不同波莫訝清時少都緣曲
處多遠能通玉塞高復接銀河大禹成門嶮為
龍始得過

○ 題南寺

久別猿啼寺流年劫逝波舊僧歸塔盡古瓦長
松多壁蘚昏題記窻螢散薜蘿平生英壯節何
故旋消磨

○ 北山秋晚

十載衣裘盡臨寒隱薜蘿心閑緣事少身老愛
山多玉露催收菊金風促翦禾燕秦正戎馬林
下好婆娑

○ 昔遊

昔遊紅杏苑今隱刺桐村歲計懸僧債科名負
國恩不書牋漸穩頻鑷鬢無根惟有經邦事年

年志尚存

酒胡子

紅筵絲竹合用爾作歡娛直指寧偏黨無私絕
覬覦當歌誰擲袖應節漸輕軀恰與真相似羶
裘滿領鬚

弔崔補闕

近來吾道少慟哭博陵君直節巖前竹孤魂嶺
上雲縉紳傳確論丞相取遺文廢却中興策何
由免用軍

弔赤水李先生

三年悲過隙一室類銷冰妻病入仙觀子窮隨
嶽僧荒垣寒有雨古屋夜無燈往日清猷著金
門幾欲徵

香鴨

不假陶鎔妙誰教羽翼全五金池畔質百和口
中煙背鈍魚難啄心空火自然御爐如有闕須
進聖君前

雞

名參十二屬花入羽毛深守信催朝日能鳴送
曉陰義冠裝瑞壁利爪削黃金徒有稻梁感何

由報德音

白鴿

舉翼凌空碧，依人到大邦。
粉翎棲畫閣，雪影拂瓊窓。
振鷺堪爲侶，鳴鳩好作雙。
狎鷗歸未得，覩爾憶晴江。

龜

行止竟何從，深溪與古峯。
青荷巢瑞質，綠水返靈蹤。
鑽骨神明應，酬恩感激重。
仙翁求一卦，何日脫龍鍾。

銀結條冠子

日下徵良匠，宮中贈阿嬌。
瑞蓮開二孕，瓊縷織千條。
蟬翼輕輕結，花紋細細挑。
舞時紅袖舉，織影透龍綃。

蜀葵

劔門南面樹，移向會仙亭。
錦水饒花艷，岷山帶葉青。
文君慚婉婉，神女讓娉娉。
爛熳紅兼紫，飄香入繡扃。

七言律詩

華清宮

十二瓊樓鎖翠微，莫霞遺却六銖衣。
桐枯丹穴

鳳何去天在鼎湖龍不歸
簾影罷添新翡翠露
華猶濕舊珠璣
君王魂斷驪山路
且向蓬瀛伴
貴妃

再幸華清宮

腸斷將軍改葬歸
錦囊香在憶當時
年來却恨
相思樹春至不生
連理枝
雪女塚頭
瑤草合貴
妃池裏
玉蓮衰
霓裳舊曲
飛霜殿
夢破魂驚絕
後期

喜雨上主人尚書

天皇攘袂救神龍
雨我公田
兆歲豐
幾日淋漓

侵暮角數宵滂沛
徹晨鐘細如春霧
籠平野
猛似秋風擊古松
門下十年耕稼者
坐來偏憶翠
微峯

迴文詩二首

飛書一幅錦文迴
恨寫深情寄鴈來
機上月殘
香閣掩樹梢煙淡
綠窻開霏霏雨罷
歌終曲漠
漠雲深酒滿林歸
日幾人行問卜
徽音想望倚

高臺

輕航數點千峯碧
水接雲山四望遙
晴日海霞
紅靄靄曉天江樹
綠迢迢清波石眼
泉當檻小

徐實詩一
逕松門寺對橋明月釣舟漁浦遠傾山雪浪暗
隨潮

不把漁竿

不把漁竿不灌園策筇吟遶綠蕪村得爭野老
眠雲樂倍感閩王與善恩鳥趁竹風穿靜戶魚
吹煙浪噴晴軒何人買我安貧趣百萬黃金未
可論

古往今來

古往今來恨莫窮不如沈醉卧春風雀兒無角
長穿屋鸚鵡能言却入籠柳惠豈嫌居下位朱

雲直去指三公閑思郭令長安宅草沒匡牆舊
事空

十里煙籠

十里煙籠一徑分故人迢遞久離羣白雲明月
皆由我碧水青山可贈君浮世宦名渾似夢半
生勤苦謾爲文北邙坡上青松下盡是鏘金佩
玉墳

偶書

巧者多爲拙者資良籌第一在乘時市門逐利
終身飽谷口躬耕盡日飢瓊玖鬻來燕石貴蓬

蒿芳處楚蘭衰高皇冷笑重瞳客蓋世拔山何
所為

潤屋

潤屋豐家莫妄求眼看多是與身讎百禽羅得
皆黃口四皓山居始白頭玉爍火光爭肯變草
芳崎岸不曾秋朱門粉署何由到空寄新詩謝
列侯

退居

鶴性松心合在山五侯門館怯趨攀旋三年卧病
不能免一日受恩方得還明月送人沿驛路白

雲隨馬入柴關笑他范蠡貪恹甚相罷金多始

退閑

閑門

閑却閑門卧竹房更何人與療膏肓一生有酒
唯和醉四大無根可預量骨冷欲針先覺痛肉
頑頻灸不成瘡漳濱伏枕文園渴盜跖縱橫似
虎狼

開窓

閉户開窓寢又興三更時節也如冰長閑便是
忘機者不出真如結夏僧環堵豈慚蝸作舍布

衣寧假鶴為翎，薔薇花盡薰風起。綠葉空隨滿架藤。

燈花

點蠟燒銀却勝栽，九華紅艷吐玫瑰。獨含冬夜寒光折，不傍春風煖處開。難見只因能送喜，莫挑唯恐墮成灰。貪膏附熱多相誤，為報飛蛾罷拂來。

東歸出城留別知己

韋蒙屈指許非才，三載長安共酒杯。欲別未攀楊柳贈，相留擬待牡丹開。寒隨御水波光散，暖

逐衡陽鴈影來。他日因書問衰颯，東溪須訪子陵臺。

詠懷

愁花變出白髭鬚，半世辛勤一事無。道在或期君夢想，貧來爭奈鬼揶揄。馬卿自愧長嬰疾，顏子誰憐不是愚。借取秦宮臺上鏡，為時開照漢妖狐。

郊村獨遊

歲閏堪憐，曆候遲出門。惟與野雲期，驚魚擲上綠荷。芰棲鳥啄餘紅荔枝末，路可能長薄命修。

途應合有良時市頭相者休相戲感滕先生半
自知

經故翰林楊左丞池亭

八角紅亭蔭綠池一朝青草蓋遺基薔薇藤老
開花淺翡翠巢空落羽奇春榜幾深門下客樂
章多取集中詩平生德義人間誦身後何勞更
立碑

經故廣平負外舊宅

門巷蕭條引涕洟遺孤三歲著麻衣綠楊樹老
垂絲短翠竹林荒著筍稀結社僧因秋朔弔買
書船近葬時歸平生欲獻匡君策抱病猶言未
息機

潘丞相舊宅

綠樹垂枝蔭四鄰春風還似舊時春年年燕是
雕梁主處處花隨落月塵七貴竟為長逝客五
侯尋作不歸人秋槐影薄蟬聲盡休謂龍門待
化鱗

門外閑田數畝長有泉源因築直堤分
為兩沼

左右澄漪小檻前直堤高築古平川十分春水

雙簷影一片秋空兩月懸圖前岸好山搖細浪夾
門嘉樹合晴煙坐來暗起江湖思速問漁翁買
釣船

北園

北園乾葉旋空枝蘭蕙還將衆草衰籠鳥上天
猶有待病龍興雨豈無期身閑不厭頻來客年
老偏憐最小兒生事罷求名與利一窻書策是
年支

溪上要一隻白簟扇蓋頭垂釣去年就
節推侍御請之蒙惠一柄紫花紋者

雖則鱗華具甚紕薄不及清源所出
因就南郡陳常侍請之遂成拙句

難求珍筴過炎天遠就金貂乞月圓直在引風
敲角枕且圖遮日上漁船魚但令織取無花簟不
用挑爲飲露蟬莫道如今時較晚也應留得到
明年

招隱

齒髮那能敵歲華早知休去避塵沙鬼神只闕
高明里倚伏不干棲隱家陶景豈全輕組綬留
侯非獨愛煙霞贈君吉語堪銘座看取朝開幕

落花

憶山中友

憶得當年接善鄰，苦將閑事強夫君。
鬪開碧沼分明月，各領青山占白雲。
近日藥方多繕寫，舊來詩草半燒焚。
金門幾欲言西上，惆悵關河正用軍。

溪隱

將名將利已無緣，深隱清溪擬學仙。
絕却腥羶勝服藥，斷除杯酒合延年。
蝸牛殼漏寧同舍，榆莢花開不是錢。
鸞鶴久從籠檻閉，春風却放紙

為鳶

酒醒

酒醒欲得適閑情，騎馬那勝策杖行。
天暖天寒三月暮，溪南溪北兩村名。
沙澄淺水魚知釣，花落平田鶴見耕。
望斷長安故交遠，來書未說九河清。

夢斷

夢斷紗窗半夜雷，別君花落又花開。
漁陽路遠書難寄，衡嶽山高月不來。
玄燕有情穿繡戶，靈龜無應祝金杯。
人生若得長相對，螢火生煙草

化灰

人事

人事飄如一炷煙且須求佛與求仙豐年甲子
春無雨良夜庚申夏足眠顏氏豈嫌瓢裏飲孟
光非取鏡中妍平生計何爲者三逕蒼苔十
畝田

休說

休說人間有陸沈一樽閑待月明斟時來不怕
滄溟濶道大却憂潢潦深白首釣魚應是分青
雲干祿已無心梓桐賦罷相如隱誰爲君前永

夜吟

嘉運

嘉運良時兩阻修釣竿簞笠樂林丘家無寸白
渾閑事身似浮雲且自繇庭際鳥啼花旋落潭
心月在水空流晨炊一箸紅銀粒憶著長安索
米秋

綠鬢

綠鬢先生自出林孟光同樂野雲深躬耕爲食
古人操非織不衣賢者心眼衆豈能分瑞璧舌
多須信爍良金君看黃閣南遷客一過瀧州絕

好音

驕侈

驕侈阡危儉素牢鏡中形影豈能逃石家恃富
身還滅顏子非貧道不遭蝙蝠亦能知日月鸞
凰那肯啄腥臊古今人事惟堪醉好脫霜裘換
綠醪

龍蟄二首

龍蟄蛇蟠却待伸和光何惜且同塵伍負豈是
吹簫者異缺非同執耒人神劍觸星當變化良
金成器在陶鈞穰侯休忌關東客張祿先生竟

相秦

休說雄才間代生到頭難與運相爭時通有詔
徵枚乘世亂無人薦禰衡逐日莫矜駑馬步司
晨誰要牝雞鳴林中且作煙霞侶塵滿關河未
可行

逐臭蒼蠅

逐臭蒼蠅豈有爲清蟬吟露最高竒多藏苟得
何名富飽食嗟來未勝飢窮寂不妨延壽考貪
狂總待笑毫釐首陽山翠千年在好奠冰壺弔
伯夷

牡丹花二首

看徧花無勝此花
翦雲披雪蘸丹砂
開當青律二三月
破却長安千萬家
天縱穠華剗鄙吝
春教妖艷毒豪奢
不隨寒令同時放
倍種雙松與辟邪

萬萬花中第一流
淺霞輕染嫩銀甌
能狂綺陌千金子
也惑朱門萬戶侯
朝日照開攜酒看
暮風吹落遶欄收
詩書滿架塵埃撲
盡日無人略舉頭

尚書座上賦牡丹
花得輕字韻其花自

越中移植

流蘇凝作瑞華精
仙閣開時麗日晴
霜月冷銷銀燭焰
寶甌圓印綵雲英
嬌含嫩臉春裝薄
紅蘸香消艷色輕
早晚有人天上去
寄他將贈董雙成

依韻和尚書再贈牡丹花

爛銀基地薄紅裝
羞殺千花百卉芳
紫陌昔曾遊寺看
朱門今再遶欄望
龍分夜雨資嬌態
天與春風發好香
多著黃金何處買
輕橈挑過鏡湖光

郡庭惜牡丹本有九字

腸斷東風落牡丹為祥為瑞久留難青春不駐
堪垂淚紅艷已空猶倚欄積蘚下銷香藥盡晴
陽高照露華乾明年萬葉千枝長倍發芳菲借
客看

追和白舍人詠白牡丹

蓓蕾抽開素練囊瓊葩薰出白龍香裁分楚女
朝雲片翦破姮娥夜月光雪句豈須徵柳絮粉
腮應恨貼梅裝檻邊幾笑東籬菊冷折金風待
降霜

憶牡丹

綠樹多和雪霰栽長安一別十年來玉侯買得
價偏重桃李落殘花始開宋玉鄰邊腮正嫩文
君機上錦初裁滄洲春暮空腸斷盡看猶將勸
酒杯

惜牡丹

今日狂風揭錦筵預愁吹落夕陽天閑看紅艷
只宜醉謾惜黃金豈是賢南國好偷誇粉黛漢
宮宜摘贈神仙良時雖作鶯花主白馬王孫恰
少年

覽柳渾汀洲採白蘋之什因成一章一本無章二字
採盡汀蘋恨別離鴛鴦鴻鴈總雙飛月明南浦
夢初斷花落洞庭人未歸天遠有書隨驛使夜
長無燭照寒機年來泣淚知多少重疊成痕在
繡衣

○ 司直巡官無諸移到玫瑰花

芳菲移自越王臺最似薔薇好並栽穠艷盡憐
勝綵繪嘉名誰贈作玫瑰春藏錦繡風吹折天
染瓊瑤日照開為報朱衣早邀客莫教零落委
蒼苔

○ 梅花

瓊瑤初綻嶺頭葩藥粉新裝姹女家舉世更誰
憐潔白癡心皆盡愛繁華玄冥借與三冬景謝
氏輸他六出花結實和羹知有日肯隨羌笛落
天涯

○ 荔枝二首

朱彈星丸粲日光綠瓊枝散小香囊龍綃殼綻
紅紋粟魚目珠涵白膜漿梅熟已過南嶺兩橋
酸空待洞庭霜蠻山蹋曉和煙摘拜捧金盤獻
越王

日日薰風卷瘴煙南園珍果荔枝先靈鴉啄破
瓊津滴寶器盛來蚌腹圓錦里只聞銷醉渴藥
宮惟合贈神仙何人刺出腥腥血深染羅紋徧
殼鮮

菊花

桓景登高事可尋黃花開處綠畦深消災辟惡
君須採冷露寒霜我自禁籬口早榮還早謝澗
松同德復同心陶公豈是居貧者剩有東籬萬
朶金

畫松

澗底陰森驗筆精筆閑開展覺神清曾當月照
還無影若許風吹合有聲枝偃只應玄鶴識根
深宜與茯苓生天台道士頻來見說似株株倚
赤城

草木

草木無情亦可嗟重開明鏡照無涯菊英空折
羅含宅榆莢不生原憲家天命豈憑醫藥石世
途還要辟蟲沙仙翁乞取金盤露洗却蒼蒼兩
鬢華

松一作畫松

澗底青松不染塵未逢良匠競誰分龍盤勁節
巖前見鶴唳翠梢天上聞大廈可營誰擇木女
蘿相附欲凌雲皇王自有增封日修竹徒勞號
此君

竹

翠染琅玕粉漸開東南移得會稽栽游絲挂處
漁竿去綠水夾時龍影來風觸有聲含六律露
沾如洗絕浮埃王猷舊宅無人到抱却清陰蓋
綠苔

尚書打球小驄步驟最奇因有所贈

善價千金未可論燕王新寄小龍孫逐將白日
馳青漢銜得流星入畫門步驟最能隨手轉性
靈多恐會人言桃花雪點多雖貴全假當場一
顧恩

尚書惠蠟面茶

武夷春暖月初圓採摘新芽獻地仙飛鵲印成
香蠟片啼猿溪走木蘭船金槽和碾沈香末冰
椀輕涵翠縷煙分贈恩深知最異晚鐺宜煮北
山泉

勸酒

休向尊前慙羽觥百壺清酌與君傾身同綠樹
年年老事比紅塵日日生六國英雄徒反覆九
原松柏甚分明醉鄉路與乾坤隔豈信人間有
利名

○ 斷酒

因論沈湎覺前非便碎金罍與羽卮採茗早馳
三蜀使看花甘負五侯期窻間近火劉伶傳坐
右新銘管仲辭此事十年前已說匡廬山下老
僧知

○ 憶舊山

澗竹巖雲有舊期二年頻長鬢邊絲遊魚不愛
金杯水棲鳥敢求瓊樹枝陶景戀深松檜隱留
侯拋却帝王師龍爭虎攫皆閑事數疊山光在
夢思

○ 西華

五千仞有餘神秀一一排雲上次瀟疊嶂出關
分二陝殘岡過水作中條巨靈廟破生春草毛
女峯高入絳霄拜祝金天乞陰德爲民求主降
神堯

○ 嵐似屏風

嵐似屏風草似茵
草邊時膾錦花鱗
山中宰相陶弘景
谷口耕夫鄭子真
宦達到頭思野逸
才多未必笑清貧
君看東洛平泉宅
只有年年百卉春

憶潼關

洞壑雙扉入到初
似從深窞覩高墟
虛天開白日臨軍國
山夾黃河護帝居
隋煬遠遊宜不反
奉春長策竟何如
須知皇漢能高鑄
延得年過四百餘

憶潼關早行

行客起看仙掌月
落星斜照濁河泥
故山遠處高飛鴈
去馬鳴時先早雞
關柳不知誰氏種
岳碑猶見聖君題
芻蕘十軸僅三尺
豈謂青雲便有梯

鴻門

舊本作失題

耨月耕煙水國春
薄徒應笑作農人
皇王尚法三推禮
白社寧忘四體勤
雨灑蓑衣芳草暗
烏啼雲樹小村貧
猶勝墮力求餐者
五斗低腰走世塵

憶長安行

舊歷關中憶廢興僭奢須戒儉須憑火光只是
燒秦冢賊眼何曾視灞陵鐘鼓煎催人自急侯
王更換恨難勝不如坐釣清溪月心共寒潭一
片澄

憶長安上省年

忽憶關中逐計車歷坊騎馬信空虛三秋病起
見新鴈八月夜長思舊居宗伯帳前曾獻賦相
君門下再投書如今說著猶堪泣兩宿都堂過
歲除

詩集卷第一

癸酉四月十一日校

詩集卷第二

莆田 徐寅 昭夢

七言律詩

長安述懷

黃河冰合尚來遊知命知時肯躁求詞賦有名
堪自負春風落第不曾羞風塵色裏彫雙鬢
鼓聲中歷幾州十載公卿早言屈何須課夏更
冥搜

長安即事三首

拋擲清溪舊釣鉤長安寒暑再環周便隨鶯羽

三春化只說蟬聲一度愁埽雪藻自憐窻紙照上
天寧愧海槎流明時側待金門詔肯羨班超萬
戶侯

無酒窮愁結自舒飲河求滿不求餘身登霄漢
平時第家得干戈定後書富貴敢期蘇季子清
貧方見馬相如明時用即匡君去不用何妨却
釣魚

拖紫腰金不要論便堪歸隱白雲村更無名籍
強金榜豈有花枝勝杏園綺席促時皆國器羽
旣飛處盡王孫高眠亦是前賢事爭報春闈莫

大恩

東京次新安道中

賊去兵來歲月長野蒿空滿壞牆匡旋從古轍
成深谷幾見金輿過上陽洛水送年催代謝嵩
山擎日拂穹蒼殊時異世為儒者不見文皇與
武皇

山陰故事

坦腹夫君不可逢千年猶在播英風紅鷺化鶴
青天遠綵筆成龍綠水空愛竹只應憐直節書
卷多是為竒童吹笙緱嶺登仙後東注清流豈

有窮

○ 温陵即事

早年師友教為文賣却魚舟網典墳國有安危
期日諫家無擔石暫從軍非才豈合攀丹桂多
病猶堪伴白雲爭得千鍾季孫粟滄洲歸與故
人分

○ 温陵殘臘書懷寄崔尚書

濟川無楫擬何為三傑還從漢祖推心學庭槐
空發火鬚同門柳即垂絲中興未遇先懷策除
夜相催也課書江上年年接君子一杯春酒二

枰碁

○ 義通里寓居即事

家住寒梅翠嶺東長安時節詠途窮牡丹窠小
春餘雨楊柳絲踈夏足風愁鬢已還年紀白衰
容寧藉酒杯紅長卿甚有凌雲作誰與清吟遶
帝宮

○ 上陽宮詞

點點苔錢上玉墀日斜空望御樓龍西裝粧臺塵暗
青鸞掩宮樹月明黃鳥啼庭草可憐分雨露君
恩深恨隔雲泥銀蟾借與金波路得入重輪伴

昇妻

西寨寓居

閑讀南華對酒杯醉攜筇竹畫蒼苔豪門有利
人爭去陋巷無權客不來解報可能醫病雀重
燃誰肯煦寒灰嚴陵萬古清風在好棹清溪詠
釣臺

功智爭馳淡薄空猶懷忠信擬何從鴟為啄腐
疑雛鳳神鬼欺貧笑伯龍烈日不融雙鬚雪病
身全仰一枝筇崇侯入輔嚴陵退堪憶啼猿萬
仞峯

題福州天王閣

絕境宜棲獨角仙金張到此亦忘還三門裏面
千層閣萬井中心一朵山江拗碧灣盤洞府石
排青壁護禪關有時海上看明月輾出冰輪疊
浪間

憶薦福寺南院

憶昔長安落第春佛宮南院獨遊頻燈前不動
惟金像壁上曾題盡古人鷓鴣聲中雙闕雨牡
丹花際六街塵啼猿溪上將歸去合問昇平詣
秉鈞

塔院小屋四壁皆是卿相題名因成四

韻

鴈塔攬空映九衢每看華宇每踟躕題名盡是
台衡迹滿壁堪為宰輔圖鸞鳳豈巢荆棘樹虬
龍多蟄帝王都誰知遠客思歸夢夜夜無船自
過湖

題名琉璃院

今改名
景祥院

一條溪遶翠巖隈行脚僧言勝五臺

一本作一條溪
碧繞崔嵬鉅

偏宜向
此隈農罷樹陰黃犢卧齋時山下白衣來松因

往日門人種路是前生長老開三卷貝多金粟

詩句前承借景祥院相同

語可能長誦免輪迴

寺中偶題

聽話金仙眉相毫每來皆得解塵勞鶴棲雲路
看方貴僧倚松門見始高名利罷燒心內火雪
霜偏垢鬢邊毛銀蟾未出金烏在更上層樓眺
海濤

山寺寓居

高卧東林最上方水聲山翠剔愁腸白雲送雨
籠僧閣黃葉隨風入客堂終去四明成大道暫
從雙鬢許秋霜披緇學佛應無分鶴氅談空亦

不妨

寄僧寓題

佛頂抄經憶惠休，衆人皆謂我悠悠。
浮生真箇醉中夢，閑事莫添身外愁。
百歲付于花暗落，四時隨却水奔流。
安眠靜笑思何報，日夜焚修祝郡侯。

游靈隱天竺二寺

丹井冷泉虛易到，兩山真界實難名。
石和雲霧蓮華氣，月過樓臺桂子清。
騰踏回橋巡像設，羅穿曲洞出龍城。
更憐童子呼猿去，颯颯蕭蕭下

樹行

醉題邑宰南塘屋壁

萬古清淮碧繞環，黃河濁浪不相關。
縣留東道三千客，宅鎖南塘一片山。
草色淨經秋雨綠，燒痕寒入曉窗斑。
閩王美景求賢製，未許陶公解印還。

題泗州塔

十年前事已悠哉，旋被鐘聲早暮催。
明月似師生又沒，白雲如客去還來。
煙籠瑞閣僧經靜，風打虛窻夜月開。
惟有南邊山色在，重重依舊上

高臺

東歸題屋壁

塵埃歸去五湖東，還是衡門一畝宮。
舊業旋從征賦失，故人多逐亂離空。
因悲盡室如懸磬，却擬攜家學轉蓬。
見說武丁天上夢，無情曾與傅巖通。

寓題

酒壺碁局似閑人，竹笏藍衫老此身。
託客買書重得卷，愛山移宅近爲鄰。
鳴蛩閣上風吹病，落葉庭中月照貧。
見說天池波浪濶，也應涓滴濺

集鱗

偶題

閑補亡書見廢興，偶然前古也填膺。
秦宮猶自拜張祿，楚幕不知留范增。
大道豈全關曆數，雄圖強半屬賢能。
燕臺財力知多少，誰築黃金到九層。

寓題述懷

大道真風早晚存，妖訛成俗汗乾坤。
宣尼旣沒蘇張起，鳳鳥不來雞雀喧。
藟少可能供驥子，草多誰復訪蘭蓀。
堯廷忘却徵元凱，天闕重關十

二門

將入城靈口道中作

路上長安咫尺間
灞陵西望接秦源
依稀日下分天闕
隱映雲邊是國門
錦袖臂鷹河北客
青桑鳴雉渭南村
高風九萬程途近
與報滄洲欲化鷗

新屋

耳順何爲土木勤
叔孫牆屋有前聞
縱然一世如紅葉
猶得十年吟白雲
性逸且圖稱野客
才難非敢傲明君
清甜數尺沙泉井
平與鄰家晝

夜分

新葺茅堂二首

翦竹誅茆就水濱
靜中還得保天真
只聞神鬼害盈滿
不見古今爭賤貧
樹影便爲廊廡屋
草香權當綺羅茵
堦前一片泓澄水
借與汀禽活紫鱗

耨水耕山息故林
壯圖嘉話負前心
素絲鬢上分愁色
絡緯牀頭和苦吟
筆硯不才當付火
方書多誑罷燒金
同年二十八君子
遊楚遊秦斷好音

茆亭

鴛瓦虹梁計已踈，織茆編竹稱貧居。翦平恰似
山僧笠埽靜，真同道者廬。秋晚捲簾看過鴈，月
明憑檻數跳魚。重門公子應相笑，四壁風霜老
讀書。

客廳

移却松筠致客堂，淨泥環堵貯荷香。衡茆只要
免風雨，藻枕不須高棟梁。豐蔀仲尼明演易，作
歌五子恨雕牆。燕臺漢閣王侯事，青史千年播
耿光。

詠寫真

寫得衰容似十全，閑開僧舍靜時懸。瘦於南國
從軍日，老却東堂射策年。潭底看身寧有異，鏡
中引影更無偏。借將前輩真儀比，未愧金鑾李
謫仙。

放榜日

喧喧車馬欲朝天，人探東堂榜已懸。萬里便隨
金鷲鷲，三台仍借玉連錢。南海相公此時在京蒙借鞍馬人僕花浮酒
影彤霞爛，日照衫光瑞色鮮。十二街前樓閣上，
捲簾誰不看神仙。

曲江宴日呈諸同年

鷓鴣驚與鳳凰同忽向中興遇至公金榜連名
昇碧落紫花封敕出瓊宮天知惜日遲遲暮春
爲催花旋旋紅好是慈恩題了望白雲飛盡塔
連空

渤海賓貢高元固先輩閩中相訪云本

國人寫得黃斬蛇劍御溝水人生幾
何賦家皆以金書列爲屏障因而有

贈

折桂何年下月中閩山來問我雕蟲肯銷金翠

書屏上誰把芻蕘過日東剡子昔時遭孔聖繇
余往日諷秦宮嗟嗟大國金門士幾箇人能振
素風

偶吟

千卷長書萬首詩朝蒸藜藿暮烹葵清時名立
難皆我晚歲途窮亦問誰碧岸釣歸惟獨笑青
山耕徧亦何爲尋常抖擻懷中策可便降他兩
鬢絲

贈表弟黃校書輅

昔居臨溪今居
近市入市五里

產破身窮爲學儒我家諸表愛詩書嚴陵雖說

此首有題無詩

臨溪隱晏子還聞近市居住句麗偷紅菡萏吟
窻冷落白蟾蜍閑來共話無生理今古悠悠事
總虛

輦下贈屯田何負外

封章頻得帝咨嗟報國唯將直破邪身到西山
書幾達官登南省鬢初華廚非寒食還無火菊
待重陽擬泛茶內翰好才兼好古秋來應數訪

君家

負外與楊老丞翰
林同年恩義最深

贈月君

山妻字月君伏見文選中顧
彥先亦有贈婦詞因抒此詠

出水蓮花比性靈三生塵夢一時醒神傳尊勝

陀羅咒佛授金剛般若經懿德好書添女誠素
容堪畫上銀屏鳴梭軋軋織織手窻戶光流織
女星

贈垂光同年

一本無同
年二字

丹桂攀來十七春如今始見茜袍新須知紅杏
園中客終作金鑾殿裏臣逸少家風惟筆札玄
成世業是陶鈞他時黃閣朝元處莫忘同年射
策人

贈楊著

一作
著作

藻麗熒煌冠士林白華榮養有曾參十年去里

君
金門改八歲能詩相座吟李廣不侯身漸老子
山操賦恨何深釣魚臺上頻相訪共說長安淚
滿襟

贈黃校書先輩閑居

取得驪龍第四珠退依僧寺卜貧居青山入眼
不干祿白髮滿頭猶著書東澗野香添碧沼南
園夜雨長秋蔬月明埽石吟詩坐諱却全無擔
石儲

尚書榮拜恩命黃疾中輒課小詩二首

以伸攀讚

明公家鑿鳳凰池弱冠封侯四海推富貴有期
天授早關河多難勅來遲昂星人傑當王佐黃
石仙翁識帝師昨日詔書猶漏缺未言商也最
能詩

東郊迎入紫泥封此日天仙下九重三五月明
臨闕澤百千人衆看王恭旗傍綠樹遙分影馬
躡浮雲不見蹤借問乘輅何處客相庭雄幕卷
芙蓉

府主僕射王搏生日

光化三年己未八月獻

熊羆先兆慶垂休天地氤氳瑞氣浮李樹影籠

周柱史昴星光照漢鄼侯數鍾龜鶴千年美律
正乾坤八月秋勲業定應歸鼎鼐生靈豈獨化
東甌

獻內翰楊侍御

窻開青瑣見瑤臺冷拂星辰逼上台丹鳳詔成
中使取白龍香近聖君來欲言溫暑三緘口閑
賦宮詞八斗才莫擬吟雲避榮貴廟堂玉鉉待
鹽梅

送劉常侍

懷君何計更留連忍送文星上碧天杜預注通

三十卷漢皇枝紹幾千年言端信義如明月筆
下篇章似湧泉他日有書隨鴈足東溪無令訪
漁舫

送盧拾遺歸華山

紫殿諫多防佞口清秋假滿別明君惟憂急詔
歸青瑣不得經時卧白雲千載茯苓攜鶴斲一
峯仙掌爲僧分門前舊客期相薦猶望飛書及
主文

春末送陳先輩之清源

貧中惟是長年華每羨君行自嘆嗟歸日捧持

明月寶去時期刻刺桐花春風避雨多游寺曉
騎聽雞早入衙千乘侯王若相問飛書與報白
雲家

上盧三拾遺以言見黜

骨鯁如君道尚存近來人事不須論疾危必厭
神明藥心惑多嫌正直言冷眼靜看真好笑傾
懷與說却爲冤因思周廟當時誠金口三緘示
後昆

送王校書往清源

南國賢侯待德風長途仍借九花驄清歌早貫

驪龍額丹桂曾攀玉兔宮楊柳堤邊梅雨熟鷓
鴒聲裏麥田空吟詩臺上如相問與說磻溪直
釣翁

岳州端午日送人游郴連

五月巴陵值積陰送君千里客于郴北風吹雨
黃梅落西日過湖青草深競渡岸傍人挂錦採
芳城上女遺簪九疑雲濶蒼梧暗與說重華舊
德音

賀清源太保王延彬二首

藥珠宮裏神仙謫八載溫陵萬戶開心地濶于

雲夢澤官資高却太行山姜牙兆寄熊羆內陶
侃文成掌握閒應笑清溪舊門吏年年扶病掩

柴關

武榮江畔祥雲一作祥蔭寵拜天人慶郡人五色鶴綾
花上敕九霄龍尾道邊臣英雄達處誰言命富
貴來時自逼身更待春風飛吉語紫泥分付與

陶鈞

病中春日即事寄主人尚書二首

身比秋荷覺漸枯致君經國墮前圖層冰照日
猶能暖病骨逢春却未蘇鏡裏白鬚擗又長枝

頭黃鳥靜還呼庾樓恩化通神聖何計能教擗
得盧

風拍衰肌久未蠲破窻頻見月團圓更無舊日
陳人問只有多情太守憐臘內送將三折股歲
陰分與五銖錢玄穹若假年齡在願捧銅盤爲
國賢

寄華山司空侍郎二首

金闕爭權競獻功獨逃徵詔卧三峯雞羣未必
容於鶴蛛網何繇捕得龍清論盡應書國史靜
籌皆可息邊烽風霜落滿千林木不近青青澗

按司空圖隱居中偏王官谷
未嘗在華別存亦表聖誕誤

底松

非雲非鶴不從容
誰敢輕量傲世蹤
紫殿幾徵王佐業
青山未拆詔書封
閑吟每待秋空月
早起長先野寺鐘
前古負材多爲國
滿懷經濟欲何從

○寄盧端公同年仁炯時遷都洛陽新立

幼主

上陽宮闕翠華歸
百辟傷心序漢儀
崑岳有炎瓊玉碎
洛川無竹鳳凰飢
須簪白筆匡明主
莫許黃衣博少師
惆悵宸居遠于日
長吁空摘鬚

邊絲

○寄天台陳希叟

陰山冰凍嘗迎夏
蟄戶雲雷只待春
呂望豈嫌垂釣老
西施不恨浣紗貧
坐爲羽獵車中相
飛作君王掌上身
拍手相思惟大笑
我曹寧比等閑人

○寄兩浙羅書記

進却湮沈退却升
錢塘風月過金陵
鴻才入貢無人換
白首從軍有詔徵
博籒集成時輩罵
讒書編就薄徒增
憐君道在名長在
不到慈恩最

上層

○ 邑宰相訪翼日有寄

淵明深念却詵貧踏破莓苔看甌塵碧沼共攀
紅菑菑金鞍不卸紫麒麟殘陽妬害催歸客薄
酒甘嘗罰主人夜半夢醒追復想欲長攀接有
何因

○ 白酒兩瓶送崔侍御

雪化霜融好潑醅滿壺冰凍向春開求從白石
洞中得攜向百花巖畔來幾夕露珠寒貝齒一
泓銀水冷瓊杯湖邊送與崔夫子誰見稽山盡

日頽

○ 依韻酬常循州

早年花縣拜潘郎尋忝飛鳴出桂堂日走登天
長似箭人同紅樹幾_豈經霜帆分南浦知離別駕
在東州更可傷公論一麾將塞詔且隨徵令過
瀟湘

謝主人惠綠酒白魚

早起鵲聲送喜頰白魚芳酒寄來珍馨香乍揭
春風甕撥刺初辭夜雨津樽潤最宜澄桂液網
踈殊未損霜鱗不曾垂釣兼親醞堪愧金臺醉

飽身

蜀

雖倚關張敵萬夫豈勝恩信作良圖能均漢祚
三分業不負荊州六尺孤綠水有魚賢已得青
桑如蓋瑞先符君王幸是中山後建國如何號
蜀都

魏

伐罪書勲令不常爭教為帝與為王十年小怨
誅桓邵一檄深讎怨孔璋在井蟄龍如屈伏食
槽驕馬忽騰驤姦雄事過分明見英識空懷許

子將

吳

一主參差六十年父兄猶慶授孫權不迎曹操
真長策終謝張昭見碩賢建業龍盤雖可貴武
昌魚味亦何偏秦嬴謾作東遊計紫氣黃旗豈
偶然

兩晉

三世深謀啓帝基可憐孀婦與孤兒罪歸成濟
皇天恨戈犯明君萬古悲巴蜀削平輕似紙句
吳吞却美如飴誰知高鼻能知數競向中原簸

戰旗

宋二首

天爵休將儋石論一身恭儉萬邦尊賭將金帶
驚寰海留得耕衣誠子孫締構不應饒漢祖姦
雄何足數王敦草中求活非吾事豈帝橫身向
廟門

百萬人甘一擲輸玄穹惟與道相符豈知紫殿
新天子只是丹徒舊嗇夫五色龍章身蚤見六
終鴻業數難逾三年未得分明夢却為蘭陵起
霸圖

陳

三惑昏昏中紫宸萬機拋却醉臨春書中不禮
隋文帝井底常攜張貴嬪玉樹歌聲移入哭金
陵天子化為臣兵戈半渡前江水狎客猶聞爭
酒巡

讀史

臣父淒涼別楚營天留三傑翼龍爭高才無主
不能用直道有時方始平喜愠子文何穎悟卷
藏蘧瑗甚分明須知飲啄繇天命休問黃河早
晚清

漢宮新寵

位在嬪妃最上頭笑他長信女悲秋日中月滿
可能久花落色衰殊未憂宮主鏡中爭翠羽君
王袖裏奪金鉤妾家兄弟知多少恰要同時拜
列侯

開元即事

曲江真宰國中忠訛尋奏漁陽忽荷戈堂上有兵
天不用幄中無策印空多楊國忠時兼諸使館三十二印塵驚騎透
潼關鎖雲護龍遊渭水波未必蛾眉能破國干
秋休恨馬嵬坡

李翰林

謫下三清第列仙幾班獲調羹鼎侍龍顏吟開鎖闥
窺天近醉卧金鑿待詔間舊隱不歸劉備國旅
魂長寄謝公山遺編往簡應飛去散入祥雲瑞
日間

聞長安庚子歲事

羽檄交馳觸冕旒函關飛入鐵兜鍪皇王去國
未為恨寰海失君方是憂五色大雲凝蜀郡幾
般妖氣撲神州唐堯縱禪乾坤位不是重華莫
謾求

公子行

十五轅門學控弦六街騎馬去如煙金多倍著
牡丹價髮白未知章甫賢有耳不聞經國事拜
官方買謝恩箋相如謾說凌雲賦四壁何曾有
一錢

依韻贈嚴司直

曾轉雙蓬到玉京宣尼恩奏樂卿名歌殘白石
扣牛角賦換黃金愛馬卿滄海二隅身漸老太
行千疊路難行夫君才大官何小堪恨人間事
不平

傷前翰林楊左丞

一本有贊
圖二字

飛上鰲頭侍玉皇三台遺耀換餘光人間搦管
窮蒼頡地上修文待卜商貞鬼肯隨金石化真
風留伴蕙蘭香皇天未啓昇平運不使伊臯相
禹湯

日月無情

日月無情也有情朝昇夕沒照均平雖催前代
英雄死還促後來賢聖生三尺靈烏金借耀一
輪飛鏡水饒清憑誰築斷東溟路龍影蟾光免
運行

新月

雲際嬋娟出又藏美人腸斷拜金方姮娥一隻
眉先掃織女三分鏡未光珠箔寄鉤懸杳靄白
龍遺爪印穹蒼更期十五圓明夜與破陰霾照
八荒

和尚書詠煙

無根無蒂結還融曾觸嵐光徹底空不散幾知
離畢雨欲飛須待落花風玲瓏薄展蛟綃片羃
屨輕含鳳竹叢瓊什捧來思舊隱撲窻穿戶曉
溟濛

宮鶯

領得春光在帝家早從深谷出煙霞閑棲仙禁
日邊柳飢啄御園天上花睨睨只宜陪閣鳳間
關多是問宮娃可憐鸚鵡矜言語長閉雕籠歲
月賒

鬢髮

鬢添華髮數莖新羅雀門前絕故人減食爲緣
踈五味不眠非是守庚申深園竹綠齊抽筍古
木蛇青自脫鱗天地有鑪長鑄物濁泥遺塊待
陶鈞

春入鯉湖

到來峭壁白雲齊
載酒春遊渡九溪
鐵障有樓霾欲墮
石門無鎖路還迷
湖頭鯉去轟雷在
樹杪猿啼落日低
回首浮生真幻夢
何如斯地傍幽棲

詩集卷第二

詩集卷第三

七言律詩

莆田 徐寅 昭夢

雙鷺

雙鷺雕籠昨夜開
月明飛出立庭隈
但教綠水池塘在
自有碧天鴻鴈來
清韻叫霜歸島樹
素翎遺雪落漁臺
何人爲我追尋得
重勸溪翁酒一杯

鷓鴣

繡僕梅兼羽翼全
楚雞非瑞莫爭先
啼歸明月

落邊樹飛入百花深處煙避燒幾曾遺遠岫引
雛時見飲晴川荔枝初熟無人際啄破紅苞墜
野田

鷹

害物傷生性豈馴且宜籠罩待知人惟擒燕雀
啗腥血却笑鸞凰啄翠筠狡兔穴多非爾識鳴
鳩脰短罰君身豪門不讀詩書者走馬平原放
翫頻

蝴蝶二首

縹緲青蟲脫殼微不堪煙重雨霏霏一枝穠艷

留教住幾處春風借與飛防患每憂雞雀口憐
香偏遠綺羅衣無情豈解關魂夢莫信莊周說
是非

拂綠穿紅麗日長一生心事住春光最嫌神女
來行雨愛伴西施去採香風定只應攢藥粉夜
寒長是宿花房鳴蟬宿分殊遶濶空解三秋噪
夕陽

郡侯坐座上觀琉璃瓶中遊魚

寶器一泓銀漢水錦鱗纔動即先知似涵明月
波寧隔欲上輕冰律未移薄霧罩來分咫尺碧

綃籠處較毫釐文翁未得沈香餌擬置金盤召
左慈

剪刀

寶持多用繡爲囊雙日交加兩鬢霜金匣掠平
花翡翠綠窻裁破錦鴛鴦初裁連理枝猶短誤
縮同心帶不長欲製溫袍先把看質非紈綺愧
銛銛

紙被

文采鴛鴦罷合歡細柔輕綴好魚牋一牀明月
蓋歸夢數尺白雲籠冷眠披對勁風溫勝酒擁

聽寒雨暖于綿赤眉豪客見皆笑却問儒生直
幾錢

紙帳

幾笑文園四壁空避寒深入剡藤中誤懸謝守
澄江練自宿嫦娥白兔宮幾疊玉山開洞壑半
巖春霧結房櫳針羅截錦饒君侈爭及蒙茸煖
避風

貢餘祕色茶盞

揆翠融青瑞色新陶成先得貢吾君巧剡明月
染春水輕旋薄冰盛綠雲古鏡破苔當席上嫩

荷涵露別江濱中山竹葉香初發多病那堪中
十分

蜀筍鞭

筍竹巖邊剔翠苔錦江波冷洗瓊瑰纍纍節轉
蒼龍骨寸寸珠簾巨蚌胎須向廣場驅駟駿莫
從閑處撻駑駘寧同晉帝環營日拋賺中途後
騎來

詠簾

素節輕盈透影勻何人巧思間成文閑垂別殿
風應度半掩行宮麝欲熏繡戶遠籠寒焰重玉

樓高挂曙光分無情幾恨黃昏月纔到如鈎便
墮雲

詠燈

分影繇來恨不同綠窻孤館兩何窮熒煌短焰
長疑暗零落殘花旋委空幾處隔簾愁夜雨誰
家當戶怯秋風莫言明滅無多事曾比人生一
世中

詠扇

為發涼飈滿玉堂每親襟袖便難忘霜凝雪暗
知何在道契時來忽自揚曾伴一樽臨小檻幾

遮殘日過迴廊漢宮如有秋風起誰信班姬淚
數行

詠筆二首

秦代將軍欲建功截龍搜兔助英雄用多誰念
毛皆拔拋却更嫌心中中史氏只應歸道直江
淹何獨偶靈通班超握管不成事投擲翻從萬
里戎

君子三歸擅一名秋毫雖細握非輕軍書羽檄
教誰錄帝命王言待我成勢健豈饒淝水陣鋒
銛還學歷山耕毛乾時或有何人潤盡把燒焚恨

始平

詠錢

多蓄多藏豈足論有誰還議濟王孫能於禍處
翻爲福解向饑家買得恩幾怪鄧通難免餓須
知夷甫不曾言朝爭暮競歸何處盡入權門與
倖門

尚書筵中詠紅手帕

鶴綾三尺曉霞濃送與東家二八容羅帶繡裙
輕好繫藕絲紅縷細初縫別來拭淚遮桃臉行
去包香墜粉胸無事把將纏皓腕爲君池上折

芙蓉

尚書新造花箋

濃染紅莢二月花只宜神筆縱龍蛇淺澄秋水
看雲母碎擘輕苔間粉霞寫賦好追陳后寵題
詩堪送竇滔家使君即入金鑾殿夜直無非草
白麻

釣車

荻灣漁客巧裝成硨鑄銀星一點輕拋過碧江
鷓鴣岸軋殘金井轆轤聲軸磨驛角冰光滑輪
卷春絲水面平把向嚴灘尋轍迹漁臺基在輾

難傾

柳

漠漠金條引線微年年先翠報春歸解籠飛靄
延芳景不逐亂花飄夕暉啼鳥噪蟬堪悵望舞
煙搖水自因依五株名顯陶家後見說辭榮種
者稀

愁

夜長偏覺漏聲遲往往隨歌慘翠眉黃葉落催
砧杵日子規啼破夢魂時明妃去泣千行淚蔡
琰歸梳兩鬢絲四皓入山招不得無家歸客最

堪欺

草

廢苑荒堦伴綠苔恩疎長信恨難開姑蘇麋鹿
應思食楚澤王孫已不來色嫩似將藍汁染葉
齊如把剪刀裁燕昭沒後多卿士千載流芳郭
隗臺

螢

月墜西樓夜影空透簾穿幕達房櫳流光堪在
珠璣列爲火不生榆柳中一一照通黃卷字輕
輕化出綠蕪叢欲知應候何時節六月初迎大

暑風

水

火性何如水性柔西來東出幾時休莫言通海
能通漢雖解浮舟也覆舟湘浦暮沈堯女怨汾
河秋泛漢皇愁洪波激湍歸何處二月桃花滿
眼流

苔

印留麋鹿野禽蹤巖壁漁磯幾處逢金谷曉凝
花影重章華春映柳陰濃石橋羽客遺前迹陳
閣才人沒舊容歸去埽除階砌下蘚痕殘綠一

重重

曉

水盡銅龍滴漸微景陽鐘動夢魂飛
潼關雞唱促歸騎金殿燭殘求御衣
窻下寒機猶自織梁間棲燕欲雙飛
羲和晴聳扶桑轡借與寰瀛看早暉

別

酒盡歌終問後期泛萍浮梗不勝悲
東門疋馬夜歸處南浦片帆飛
去時賦罷江淹吟更苦詩成蘇武思何遲
可憐范陸分襟後空折梅花寄

所思

夜

日墜虞淵燭影開沈沈煙霧壓浮埃
剡川雪滿子猷去漢殿月生王母來
簷挂蛛絲應漸織風吹螢火不成灰
愁人莫道何時旦自有鐘鳴漏滴催

雨

引雷隨龍密又輕酒杯閑喫得嘉名
千山草木如雲暗陸地波瀾接海平
灑竹幾添春睡重滴簷偏遣夜愁生
陰妖冷孽成何怪敢蔽高天日

月明

萍

爲實隨流瑞色新
泛風縈草護遊鱗
密行碧水澄涵月
澀滯輕橈去採蘋
比物何名腰下劍
無根堪並鏡中身
平湖春渚知何限
撥破閑投獨繭綸

恨

事與時違不自繇
如燒如刺寸心頭
烏江項籍忍歸去
鴈塞李陵長繫留
燕國飛霜將破夏
漢宮紈扇豈禁秋
須知人骨難銷處
莫比人間取

次愁

鴻

行如兄弟影連空
春去秋來燕不同
紫塞別當秋露白
碧山飛入暮霞紅
宣王德美周詩內
蘇武書傳漢苑中
況解銜蘆避弓箭
一聲歸喚楚天風

鶴

閨苑瑤臺歲月長
一歸華表好增傷
新聲乍警初零露
折羽閑飛幾片霜
要伴神仙歸碧落
豈隨龜鴈往西塘
三山頂上無人處
瓊樹堪巢不

死鄉

鵲

神化難源瑞即開雕陵毛羽出塵埃香閨報喜
行人至碧漢填河織女回明月解隨烏繞樹青
銅寧愧雀為臺瓊枝翠葉庭前植從待翩翩去
又來

霜

應節誰窮造化端菊黃豺祭問應難紅窓透出
鴛衾冷白草飛時鴈塞寒露結芝蘭瓊屑厚日
乾葵藿粉痕殘世間無比催搖落松竹何人肯

更看

風

城上寒來思莫窮土囊萍末兩難同飄成遠浪
江湖際吹起暮塵京洛中飛雪蕭條殘臘節落
花狼藉古行宮春能和煦秋搖落生殺還同造
化功

帆

豈勞孤棹送行舟輕過天涯勢未休斷岸曉看
殘月挂遠灣寒背夕陽收川平直可追飛箭風
健還能泝急流幸遇濟川恩不淺北溟東海更

何愁

○ 夢

月落燈前閉北堂，神魂交入杳冥鄉。
文通毫管醒來異，武帝蘅蕪覺後香。
傳說已徵賢可輔，周公不見恨何長。
生松十八年方應，通塞人間豈合忙。

東

紫氣^天元出故關，大明先照九垓間。
鰲山海上秦娥去，鱸膾江邊齊椽還。
青帝郊垆平似砥，主人階級峻如山。
蟠桃樹在煙濤水，解凍風高未

得攀

西

密雲郊外已回秋，日下崦嵫景懶收。
秦帝城高堅似鐵，李斯書上曲如鉤。
寧惟東岳凌天秀，更有長庚瞰曙流。
見說山傍偏出將，犬戎降盡復何愁。

南

罩罩嘉魚憶此方，送君前浦恨難量。
火山遠照蒼梧郡，銅柱高標碧海鄉。
陸賈幾時來越島，三閤何日濯滄浪。
鍾儀冠帶歸心阻，蝴蝶飛園萬

草芳

北

雪滿胡天日影微
李君降虜失良時
窮溟駕浪鷗鵬化
極海寄書鴻鴈遲
來猶未啓殘

兵奔去杳難追
可憐燕谷花間晚
鄒律如何為一吹

雲

漠漠沈沈向夕暉
蒼梧巫峽兩相依
天心白日休空蔽
海上故山應自歸
似蓋好臨千乘載
如羅堪翦六銖衣
為霖須救蒼生旱
莫向西郊作

雨稀

燕

從待銜泥賤客衣
百禽靈性比他稀
何嫌何恨秋須去
無約無期春自歸
鷗鷺不容應自怪
棟梁堪庇願相依
吳王宮女嬌相襲
合整雙毛預奮飛

蟬

寒鳴寧與衆蟲同
翼鬚綏冠豈道窮
殼脫已從今日化
聲愁何似去年中
朝催籬菊花开露
暮促庭槐葉墜風
從此最能驚賦客
計居何處轉

飛蓬

露

鶴鳴先警鴈來天洗竹沾^露花處處鮮散彩幾當
蟬飲際凝光宜對蚌胎前朝垂苑草煙猶重夜
滴宮槐月正圓怵惕與霜同降日蘋蘩思薦獨
淒然

霞

天際何人濯錦歸偏宜殘照與晨暉流為洞府
千年酒化作靈山幾襲衣野燒燄連殊赫奕愁
雲陰隔乍依稀勞生願學長生術飡盡紅桃上

漢飛

蒲

濯秀盤根在碧流紫茵含露向晴抽編為細履
隨君步織作輕帆送客愁踈葉稍^變投餌釣密
叢還碍採蓮舟鴛鴦多情甚日日雙雙遶
傍遊

泉

非鑿非䟽出洞門源深流嶮合還分高成瀑布
漱逋客清入御溝朝聖君迸滴幾山穿破石迅
飛層嶠噴開雲舊齋一帶連松竹明月窓前枕

上聞

煙

燎野焚林見所從
惹空橫水展形容
能滋甘雨隨車潤
不並行雲逐夢蹤
晴鳥迴籠嘉樹薄
春亭嬌幕好花濃
有時片片風吹去
海碧山青過幾重

閑

不管人間是與非
白雲流水自相依
一瓢挂樹傲時代
五柳種門吟落暉
江上翠娥遺佩去
岸邊紅袖採蓮歸
客星辭得漢光武
却坐東江舊

蘇磯

忙

雙競龍舟疾似風
一星毬子兩明^口
同平吳破蜀三除^口
裏滅楚圖秦百戰中
春近杜鵑啼不斷
寒催歸鴈去何窮
兵還失路旌旗亂
驚起紅塵似轉蓬

淚

發事牽情不自由
偶然惆悵即難收
已聞抱玉沾衣濕
見說迷途滿目流
滴盡綺筵紅燭暗
墜殘裝閣曉花羞
世間何處偏留得
萬點分明湘

水頭

月

碧落誰分造化權
結霜凝雪作嬋娟
寒蟬若不開三穴
狡兔何從上九天
莫見團圓明處遠
須看彎曲鑿時偏
却說樹老堯莫換
惆悵今年似去年

五言長律

依御史温飛卿華清宮二十二韻

地靈蒸水暖
天氣待宸遊
嶽拱蓮花秀
峯高玉藥秋
朝元雕翠閣
乞巧繡瓊樓
碧海供驪嶺
黃

此上三卷

疑作路

汪游月宮下有口後口
祿山五字

金絡馬頭五王更入帳
七貴迭封侯
夕雨鳴鴛瓦
朝陽擘柘裘
伊臯爭負鼎
舜禹讓垂旒
墮珥閑應拾
遺釵醉不收
飛煙籠劔戟
殘月照旌旒
履朔求衣早
臨陽解佩羞
宮詞裁錦段
御筆落銀鈎
帝里新豐縣
長安舊雍州
雪衣傳貝葉
蟬鬢插山榴
對景瞻瑤兔
昇天駕綵虬
此言遊月宮
羽書陳北虜
玄甲擐犀牛
聖誥多屯否
生靈少怨尤
穹旻當有輔
帷幄豈無籌
鳳態傷紅艷
鸞輿緩紫騮
樹名端正
在人欲夢魂
休讖語山旁
鬼塵銷隴畔
丘重來芳草
恨往事落花
愁五十年鴻

徐寅詩三

七

業東憑渭水流

尚書命題瓦硯

遠向端溪得皆因郢匠成鑿山青靄斷琢石紫
花輕散墨松香起濡毫藻句清入臺知價重著
匣恐塵生守墨還全器臨池早著名春闈攜就
處軍幙載將行不獨雄文陣兼能助筆耕莫嫌
涓滴潤深染古今情洗處無瑕玷添時識滿盈
蘭亭如見用敲夏有金聲

東風解凍省試

暖氣飄蘋末凍痕銷水中扇冰初覺泮吹海旋

成空入律三春照朝宗萬里通岸分天影濶色
照日光融波起輕搖綠鱗遊乍躍紅殷勤排弱
羽飛翥趁和風

和僕射二十四丈牡丹八韻

帝王城裏看無故亦無新忍摘都緣借移栽未
有因光陰嫌太促開落一何頻羞殺登牆女饒
將解佩人藥堪靈鳳啄香許白龍親素練籠霞
曉紅裝帶臉春莫辭終夕醉易老少年身買取
歸天上寧教逐世塵

釣絲竹

蓊蓊拂清流堪維舴艋舟野蟲懸作餌溪月曲
為鉤雨潤搖堦長風吹繞指柔若將諸樹比還
使綠楊羞蠶婦非堯女漁人是子猷湖邊舊栽
處長映讀書樓

七言長律

尚書會仙亭詠薔薇寅坐中聯四韻晚

歸補緝所聯因成一篇

結綠根株翡翠莖句芒中夜刺腥腥腥腥景陽裝赴
嚴鐘出楚峽神教暮雨晴躑躅豈能同日語玫
瑰方可一時呈風吹嫩帶香苞展露灑啼腮淚

點輕阿母藥宮期索去昭君榆塞闕齋行叢高
恐礙含泥燕架隱宜棲報曙鶯鬪日只憂燒密
葉映階疑欲讓雙旌含煙散纈佳人惜落地遺
鈿少妓爭丹渥不因輸繡段錢圓誰把買花聲
海棠若要分流品秋菊春蘭兩恰平

和尚書詠泉山瀑布十二韻

名齊火浣溢山椒誰把驚虹挂一條天外倚來
秋水刃海心飛上白龍綃民田鑿斷雲根引僧
圃穿通竹影澆噴石似煙輕漠漠濺崖如雨冷
瀟瀟水中蠶緒纏蒼壁日裏虹精挂絳霄寒漱

綠陰仙桂老碎流紅艷野桃夭千尋練寫長年
在六出花開夏日消急恐劃分青嶂骨久應禡
裂翠微腰濯纓便可譏漁父洗耳還宜傲帝堯
林際猿猱偏得飯岸邊烏鵲擬爲橋赤城未到
詩先寄廬阜曾遊夢已遙數夜積霖聲更遠郡
樓敲枕聽良宵

自詠十韻

只合滄洲釣與耕忽依螢燭愧功成未遊宦路
叨卑宦纔到名場得大名梁苑二年陪衆客温
陵十載佐雙旌錢財盡是侯王惠骨肉偕承里

巷榮拙賦偏聞鑄印賣惡詩親見畫圖呈

使宅行寅回文

八體詩圖兩面庚午秋使樓赴宴每倒翻讀八韻也

多栽桃李期春色濶鑿池

塘許月明寒益輕稠饒美寢出乘車馬免徒行
粗支菽粟防飢歉薄有盃盤備送迎僧俗共鄰
棲隱樂妻孥同愛水雲清如今便死還甘分莫
更嫌他白髮生

七言絕句

鏡中覽懷

一本無懷字一作覽鏡書懷

晨起梳頭忽自悲鏡中親見數莖絲從今休說
龍泉劍世上恩讎報已遲

楚國史

六國商於恨最多良弓休縮劍休磨君王不翦
如簧舌再得張儀欲奈何

張儀

荆楚南來又北歸分明舌在不應違懷王本是
無心者籠得蒼鷹却放飛

薔薇

朝露灑時如濯錦晚風飄處似遺鈿重門剩著
黃金鎖莫被飛瓊摘上天

大夫松

五樹旌封許歲寒挽柯攀葉也無端爭如澗底
凌霜節不受秦皇號此官

杏園

杏苑葉簫聲好醉鄉春風嘉宴更無雙憑誰為謔
穆天子莫把瑤池並曲江

蕉葉

綠綺新裁織女機擺風搖日影離披只應青帝
行春罷閒倚東牆卓翠旗

路旁草

楚甸秦原萬里平誰教根向路旁生輕蹄繡轂

長相躡合是榮時不得榮

讀漢紀

布衣空手取中原勁卒雄師不足論
楚國八千秦百萬豁開胃臆一時吞

李夫人二首

不望金輿到錦帷人閒樂極即須悲
若言要識愁中貌也似君恩日日衰
招得香魂爵少翁九華燈燭曉還空
漢王不及吳王樂且與西施死處同

明妃

不用牽心恨畫工帝家無策及邊戎
香魂若得昇明月夜夜還應照漢宮

馬嵬

二百年來事遠聞從龍誰解盡如雲
張均兄弟皆何在却是楊妃死報君

依韻贈南安方處士五首

七貴五侯生肯退利塵名網死當拋
黔婁寂寞嚴陵卧借問何人與結交

休把羸蹄躡雪霜書成何處獻君王
嵩山好與浮丘約三十六峯雲外鄉

百萬僧中不爲僧比君知道僅誰能無家寄泊
南安縣六月門前也似冰
兩鬢當春却似秋僻居誇近野僧樓落花明月
皆臨水明月不流花自流
晉楚忙忙起戰塵龔黃門下有高人一畦雲薤
三株竹席上先生未是貧

依韻荅黃校書

慈恩鴈塔參差榜杏苑鶯花次第遊白日有愁
猶可散青山高卧况無愁

傷進士謝庭皓

大順中以詞賦者名與黃不相上下時號錦繡帷

獻書猶未達明君何事仙遊岱岳雲惟有春風
護冤魄與先青草蓋孤墳

聞司空侍郎訃音

園綺生雖逢漢室巢繇死不謁堯階八微不起夫君
歿後何人葬合取夷齊隱處埋

偶題二首

買骨須求騏驥骨愛毛宜採鳳凰毛駕駘燕雀
堪何用仍向人前價例高
賦就長安振大名斬蛇功與樂天爭歸來延壽
溪頭坐終日無人問一聲

猿

宿有喬林飲有溪生來蹤跡遠塵泥不知心更
愁何事每向深山夜夜啼

○ 追和賈浪仙古鏡

誰聞黃帝喬山塚明月飛光出九泉狼藉蘚痕
磨不盡黑雲殘點汙秋天

○ 蝴蝶三首

不並難飛繭裏蛾有花芳處定經過天風相送
輕飄去却笑蛛蜘蛛謾織羅

苒苒雙雙拂畫欄佳人偷眼再三看莫欺翼短

飛長近試就花間撲已難

栩栩無因索得他野園荒徑一何多不聞絲竹
誰教舞應仗流鶯爲唱歌

○ 新刺襪

素手春溪罷浣紗沙巧裁明月半彎斜齊宮合贈
東昏寵好步黃金菑菑花

○ 寄華山司空侍郎

仙掌林中第一人鶴書時或問眠雲莫言踈野
全無事明月清風肯放君

○ 初夏戲題

長養薰風拂曉吹漸開荷芰落薔薇青蟲也學
莊周夢化作南園蛺蝶飛

詩集卷第三

洪憲元年元日校季鈔本次第都合第分作四卷

為異耳

增湘漫記

也是園鈔本鈔磯文集自卷六至卷十皆詩也从瞿

氏假借以席刻校之其字句略有異惜蓮中未携有

全集以致前丰文集無以校定也癸酉四月沅林記

張蠡詩集

長安春望

明時不敢卧煙霞又見秦城換物華殘雪未銷
雙鳳闕新春已發五侯家一作甘貧祇擬長緘酒忍
病猶期強採花故國別來桑柘盡十年兵踐海
西涯

獻所知

跡熟荀家見弟兄九霄同與指前程吹噓漸覺
馨香出夢寐長疑羽翼生在僻驂騮皆識路來
頻鸚鵡亦知名登龍不敢懷他願祇望為霖致

太平

經范蠡舊居

一變姓名離百越越城猶在范家無他人不見
扁舟意却笑輕生泛五湖

抒懷

幾出東堂謝不才便甘閑望故山迴翻思未是
離家久更有人從外國來

言懷

不將高蓋競煙塵自向蓬茅認此身唐祖本來
成大業豈非姚宋是平人

南康夜宴東溪留別郡守陸郎中

飄然野客才無取多謝君侯獨見知竹葉樽前
教駐樂桃花紙上待君詩香迷蛺蝶投紅燭舞
拂蒹葭倚翠帷明發別愁何處去片帆天際酒
醒時

送盧尚書赴靈武

西北正傳烽堠急靈州共喜信臣居從軍盡是
清才去屬郡無非上將除新地進圖移漢界古
城遺硯見蕃書山川不異江湖景賓館常聞食
有魚

夏日題老將林亭

百戰功成翻愛靜
侯門漸欲似仙家
牆頭雨細垂纖草
水面風迴聚落花
井放轆轤閑浸酒
籠開鸚鵡報煎茶
幾人圖在凌煙閣
曾不交鋒向塞沙

贈江都鄭明府

他人豈是稱才術
才術須觀力有餘
兵亂幾年臨劇邑
公清終日似閑居
牀頭怪石神仙畫
篋裏華牋將相書
更欲棲蹤近彭澤
香爐峰下結茅廬

宴駙馬宅

牙香禁樂鎮相攜
日日君恩降紫泥
紅藥院深人半醉
綠楊門掩馬頻嘶
座中古物多仙意
壁上新詩有御題
別向庭蕪置吟石
不教宮妓躡成蹊

贈信安太守

三衢正對福星時
喜得君侯妙撫綏
甲士散教耕墾畝
書生閑許從旌旗
條章最是貧家喜
禾黍仍防別郡飢
昨日中宮說天意
即飛丹詔立新碑

贈水軍都將

平生爲有安邦術，便別秋曹最上階。
戰艦却容儒客卧，公廳唯伴野僧齋。
裁詩書榭迴冰膠筆，養藥堂深薜惹鞋。
直待門前見幢節，始應高愜聖君懷。

邊情

窮荒始得靜天驕，又說天兵擬渡遼。
聖主尚嫌蕃界近，將軍莫恨漢庭遙。
草枯朔野春難發，冰結河源夏半銷。
惆悵臨戎皆効國，豈無人似霍嫖姚。

弔萬人冢

兵罷淮邊客路通，亂鴉來去噪寒空。
可憐白骨攢孤冢，盡爲將軍覓戰功。

贈鄭司業

晚學更求來世達，正懷非與百邪侵。
古人名在，今人口不合於名，不苦心。

別鄭仁表

春雷醉別鏡湖邊，官顯才狂正少年。
紅燭滿汀歌舞散，美人迎上木蘭船。

贈段逸人

長筇自擔藥兼琴話著名山即擬尋縱聽世人
權一作似火不能燒得卧雲心

上所知

初向眾中留姓字敢期言下致時名而今馬亦
知人意每到門前不肯行

過黃牛峽

黃牛來勢瀉巴川疊日孤舟逐峽前雷電夜驚
猿落樹波濤愁恐客離船盤渦逆入嵌空地斷
壁高分繚繞天多少人經過此去一生魂夢怕
潺湲

疑作波濤秋急

投翰林張侍郎

舉家貧拾海邊樵來認仙宗在碧霄丹穴雖無
凡羽翼靈椿還長高細枝條九衢馬識他門少十
載身辭故國遥願與吾君作霖雨且應平地活
枯苗

贈九江太守

江頭暫駐木蘭船漁父來誇太守賢二邑旋添
新戶口四營漸廢舊戈鋌笙歌不似經荒後禮
樂猶如未戰前昨日西亭從遊騎信旗風裏說
詩篇

疑作漸添旋放

喜友人日南迴

南遊曾去海南涯此去遊人不易歸白日霧昏
張夜燭窮冬氣暖著春衣溪荒毒鳥隨船啣洞
黑冤蛇出樹飛重入帝城何寂寞共迴遷客半
輕肥

贈李司徒

承家拓定隴關西勲貴名應上將齊金庫夜開
龍甲今玉堂秋閉鳳笙低歡筵每怨嬌娥醉閑
櫪猶驚戰馬嘶長怪魯儒頭枉白不親弓劍覓
丹梯

投翰林蕭侍郎

九仞牆邊絕路岐岐野才非合自求知靈湫豈要
魚棲浪仙桂那容鳥寄枝纖草不銷春氣力微
塵還助岳形儀從來爲學投文鏡文鏡如今更
有誰

下第述懷

十載長安跡未安杏花還是看人看名從近事
方知險詩到窮玄更覺難世薄不慙雲路晚家
貧唯怯草堂寒如何直道爲身累坐月眠霜思
枉乾

張翥集
六
贈丘衙推

仙都高處掩柴扉，人世聞名見者稀。
詩逸不拘凡對屬，易窮皆達聖玄微。
偶攜童稚離青嶂，便被君侯換白衣。
任醉賓筵莫深隱，綺羅絲竹勝漁磯。

觀江南牡丹

北地花開南地風，寄根還與客心同。
羣芳盡怯千般態，幾醉能消一番紅。
舉世祇將華勝實，真禪元喻色爲空。
近年明主思王道，不許新栽滿六宮。

贈南昌宰

假邑邀真邑，命分明。庭元有至公存，每鋤積弊。
同荆棘，唯撫孤惇。似子孫折獄，不曾偏下筆靈。
襟長是大開門，新銜便合兼朱紱。應待蒼生更舉論。

投所知

十五年看帝里春，一枝頭白未酬身。
自聞離亂開公道，漸數孤平少屈人。
劣馬每尋商嶺路，病舟重寄越溪濱。
省郎門似龍門峻，應借風雷變涸鱗。

青冢

傾國可能勝効國無勞冥冥更思迴回太真雖是
承恩死祇作飛塵向馬嵬

傷賈島

生爲明代苦吟身死作長江一逐臣可是當時
少知己不知知己是何人

龜山寺晚望

四面湖光絕路岐鷓鴣飛起暮鐘時漁舟不用
懸帆席歸去乘風插柳枝

長安寓懷

九衢秋雨掩閑扉不似千名似息機貧病却慙
牆上土年來猶自換新衣

古戰場

荒骨潛銷壘已平漢家曾說此文兵如何萬古
冤魂在風雨時聞有哭聲

再遊西山贈許尊師

別後已聞師得道不期猶在此山頭昔時霜鬢
如今漆疑是年光却倒流

華陽道者

華陽洞裏持真經心嫌來客風塵腥唯餐白石

三字鈔本用粉筆去

張翥集

過白日擬騎青竹上青冥翔螭豈作漢武駕神
娥徒降燕昭庭長生不必論貴賤却是幽人骨
主靈

言懷

十^年聲沉覺自非賤身元合衣荷衣豈能得路
陪先達却擬還家望少微戰馬到秋長淚落傷
禽無夜不魂飛平生祇學穿楊箭更向何門是
見機

逢道者

縱意出山無遠近還如孤鶴在空虛昔時親種

樹皆老此世相逢人自疎野葉細包深洞藥巖
蘿閑束古仙書終^終尋隱跡歸何處方說煙霞不
定居

宮詞

日透珠簾見冕旒六宮爭逐百花球迴看不覺
君王去已聽笙歌在遠樓

自諷

鹿鳴筵上強稱賢一送離家十四年同隱海山
燒藥伴不求丹^{一作}桂却登仙

叙懷

張翥集

九

月裏路從何處上江邊身合幾時歸十年九陌
寒風夜夢掃蘆花絮客衣

送薛郎中赴江州

幾州聞出刺謠美有江民正向傳天旨懸心禱
岳神尺書先假路紅旆旋燒塵郡顯山川別衙
開將吏新散招僧坐暑閑載客行春聽事某忘
著探題酒亂巡好編高隱傳多貌上昇真近日
居清近求人在此人

題嘉陵驛

嘉陵路惡石和泥行到長亭日已西獨倚欄杆

正惆悵海棠花裏鷓鴣啼

送縉雲尉

釋褐從仙尉之官興若何去程唯水石公署在
雲蘿野阪樓中迴晴峰案上多三年罷趨府應
更戰高科

送友人歸武陵

聞近桃源住無村不是花戍旗招海客廟鼓集
江鴉別島垂橙實閑田長荻芽遊秦未得意看
便更離家

送董卿赴台州

九陌除書出尋僧問海城家從中路挈吏隔數
州迎夜蚌侵燈影春禽雜櫓聲開圖見異跡思
上石橋行

送徐州薛尚書

上將出儒中論詩擬立功州從禹後別軍自漢
來雄遠驛銷寒日嚴城肅暮空龍顏有遺廟猶
得奠英風

十五夜與友人對月

每到月圓思共醉不宜同醉不成歡一千二百
如輪夜浮世誰能得盡看

送成州牧

清時爲塞郡自古有儒流素望知難愜新恩且
用酬犬牙連蜀國兵額貫秦州祇作三年別誰
能聽邑留

雲朔逢山友

會向却生疑居然似夢歸塞深行客少家遠識
人稀戰馬分旗牧驚禽曳箭飛將軍雖異禮難
便一作便使脫麻衣

宿開照寺光澤上人院

靜室談玄旨清宵獨細聽真身非有像至理本

無經鐘定遙聞水樓高別見星不教人觸穢偏
說此山靈

逢漳州崔使君北歸

在郡多殊稱無人不望迴回離城攜客去度嶺擔出作
猿來障寫經冬葺瓶緘落暑梅長安有歸宅歸
見鎖青苔

題紫閣院

上方人海外苔徑上千層洞壑有靈藥房廊無
老僧古巖雕素像喬木掛寒燈每到思脩隱將
迴若不能

宿山寺

中峰半夜起忽覺在有青冥下此界自生雨上方猶
有星樓高鐘尚一作遠殿古像多靈好是潺湲水
房房伴誦經

過山家

避暑得探幽忘言遂久留雲深燈失曙松合徑一作
先秋響谷傳人語鳴泉洗客愁家山不在此至
此可歸休

和崔監丞春遊鄭僕射東園

春興隨花盡東園自養閑不離三畝地似入萬

重山白鳥穿蘿去，清泉抵石還。豈同秦代客，無位隱商顏。

次韻和友人冬日書齋

四季多花木，窮冬亦不凋。薄冰行處斷，殘火睡來消。篆版簽書帙，蠻藤絡酒瓢。公卿有知己，時得一相招。

新竹

新鞭暗入庭，初長兩三莖。一作一莖不是他山少，無如此地生。垂梢叢上出，柔葉籜間成。何用高唐峽，風枝掃月明。

叢葦

叢一作葦寒水邊，曾折打魚船。一作釣忽一作或與亭臺近，翻嫌島嶼偏。花明無月夜，聲急正秋天。遙憶巴陵渡，殘陽一望煙。

贈曹郎中

所作高前古，封章自曲臺。細看明主意，終用出人才。省印尋僧鎖，書樓領鶴開。南山有舊友，時向白雲來。

亂中寄友人

別來難覓信，何處避艱危。鬢黑無多日，塵清知是

幾時人情將厭武王澤即興詩莫若便懷深隱還
應聖王知

寄友人

戀道欲何如東西遠索居長疑即見面翻致久
無書旬麥深藏雉淮苔淺露魚相思不我會明
月幾屢盈虛

贈別山友

從容無限意不獨為離羣年長驚黃葉時清厭
白雲舊山迴馬見寒瀑別家聞相與存吾道窮
通各自分

別後寄友生一作崔魯詩

上馬如飛鳥飄然隔去塵共看今夜月獨作異
鄉人就養江田熟移居并賦新襄陽所曾卜隱應
與孟家鄰

途次績溪先寄陳明府

入境風煙好幽人不易傳新居多是客舊隱半
成仙山斷雲衝騎溪長柳拂船何當許過縣聞
有篋中篇

哭建州李貞外

詩名不易出名出又何為捷到重科早官終一

郡卑素風無後嗣遺跡有生祠自罷羊公市溪
猿苦舊時

弔孟浩然

每每樵家說孤墳亦夜吟若重生此世應更苦
前心名與襄陽遠詩同漢水深親栽鹿門樹猶
蓋石牀陰

送友人赴涇州幕

一作送李中
丞再赴虔州

杏園沉飲散榮別就嘉招日月將期盡山川獨
去遙府樓明蜀雪關磧轉胡鵬縱有煙塵動應
隨上策銷

和友人送趙能卿東歸

一第時難得歸期日已過相看玄髮少共憶白
雲多楚澗天垂草吳空月上波無人不有遇之
子獨狂歌

送人歸南中

有家誰不別經亂獨難尋遠路波濤惡窮荒雨
霧深燒鷲山象出雷觸海鼇沉爲問南遷客何
人在瘴林

送友人及第歸

一本題下有
新羅二字

家林滄海東未曉日先紅作貢諸蕃別登科幾

國同遠聲魚呷浪層氣屢迎風鄉俗稀攀桂爭
來問月宮

邊遊別友人

欲別不止淚當盃難強歌家貧隨日長身病涉
寒多雨雪迷燕路田園隔楚波良時未自致歸
去欲如何

將之京師留別親友

達命何勞問西遊且自期至公如有日知我豈
無時野迴蟬相答堤長柳對垂酣歌一舉袂明
發不堪思

宿山驛

驛在干峰裏寒宵獨此身古墳時見火荒壁悄
無鄰月白翻驚鳥雲閑欲就人祇應明日鬢更
與老相親

邊庭送別

一生雖達理遠別亦相悲白髮無脩處青松有
老時暮煙傳戍起寒日隔沙垂若是長安去何
難定後期

登單于臺

邊兵春盡迴獨上單于臺白日地中出黃河天

外來沙翻痕似浪風急響疑雷欲向陰關度陰
關曉不開

過蕭關

出得蕭關北儒衣不稱身隴狐一作猿來試客沙鷗
下欺人曉戍殘衙火晴原起獵塵邊戎莫相忌
非是霍家親

薊北書事

度磧如經海茫然但見空戍樓承落日沙寒礙
驚蓬暑過燕僧出時平虜客通逢人皆上將誰
有定邊功

應疑作映

白菊

秋天木葉乾猶有白花殘舉世稀栽得豪家却
盡看片苔相應綠諸卉獨宜寒幾度攜佳客登
高欲折難

鄭轂補闕山松

心將積雪欺根與白雲離遠寄僧猶憶高看鶴
未知影文新長葉斂匝舊生枝多少同時種深
山不得移

華山孤松

石罅引根非土力冒寒猶助岳蓮光綠槐生在

膏腴地何得無心拒雪霜

假瞿氏明寫本覆勘一通原存經全賦蒼何義門
黃美圃諸家核定其原則出於書棚本也
癸酉四月初十日清泉逸叟記於孫氏小墨妙亭

張蠟詩集

乙卯八月初七日校明鈔本改定十餘字 沅林

以李漁葦鈔本再校 乙卯十月二十日 沅林

臨安府棚北大街睦親坊南陳宅書籍印行

張蠟詩補遺

此據李鈔本補錄者

盆池

圓內陶化功外絕衆流通選處離松影穿時減
藥叢別疑天在地長對月當空每使登門客煙
波入夢中

野泉

遠出白雲中長年聽不同一作窮清聲縈亂石一作
亂寒色入長潭一作潭空挂壁聊成雨穿林別起風
溫泉非爾數源發在深空

塞下曲

膏腴地何得無心拒雪霜

假瞿氏明寫本覆勘一通原本經金耿菴何義門
黃芟圃諸家核定其原則出於書棚本也
癸酉四月初十日清泉逸史記於孫氏小墨妙亭

張蠟詩集

乙卯八月初七日校明鈔本改定十餘字沈林

以李漁葦鈔本再校乙卯十月二十日沈林

臨安府棚北大街睦親坊南陳宅書籍印行

張蠟詩補遺

此據李鈔本補錄者

盆池

圓內陶化功外絕衆流通選處離松影穿時減
藥叢別疑天在地長對月當空每使登門客煙
波入夢中

野泉

遠出白雲中長年聽不同一作窮清聲縈亂石一作
亂石寒色入長潭一作潭空挂壁聊成雨穿林別起風
溫泉非爾數源發在深空

塞下曲

邊事多更變天心亦為憂胡兵來作冠漢將也
封侯夜燒衝星赤寒塵翳日愁無門展微略空
上望西樓

邊將二首

歷戰燕然北功高劍有威聞名外一作國懼輕
命故人稀角怨星芒動塵愁日色微從為漢都
護未得脫征衣

按劍立城樓西看極海頭承家為上將開地得
邊州磧迥兵難伏天寒馬易收胡風一度獵吹
裂錦貂裘

朔方書事

秋盡角聲苦逢人唯荷戈城池向隴少岐路出
關多雁遠行垂地烽高影入河仍聞黑山寇又
覓漢家和

經荒驛

古驛成幽境雲蘿隔四隣夜燈移宿鳥秋雨禁
行人廢巷荆叢合荒庭虎迹新昔年經此地終
日是紅塵

贈棲白太師

剃髮得時名僧應別應星偶題皆有詔閑論便

成經掃葉寒燒鼎融冰曉注瓶長因內齋出多
客叩禪扃

贈聞一上人

見面雖年少聞名似白頭玄談窮釋旨清思掩
詩流果落痕生砌松高影上樓壇場在三殿應
召入焚修

贈可倫上人

師教本於空流來不自東修從多劫後行出衆
人中衲冷湖山雨幡輕海甸風游吳累夏講還
與虎溪同

寄法乾寺令諲太師

師居中禁寺外請已無緣望幸唯修偈承恩不
亂禪院多喧種藥池有化生蓮何日龍宮裏相
尋借法船

寄太白禪師

何年萬仞頂獨有坐禪僧客上應無路人傳或
見燈齋厨一作盂唯有椽講石任生藤遙想東林
社如師誰復能

遇道者

數里白雲裏身輕無履蹤故尋多不見偶到即

相逢古井生雲水高壇出異松聊看杏花酌便
似換顏容

贈道者

得道疑人識都城獨閉閑頭從白後黑心向閑
中閑飢渴唯調氣兒孫亦駐顏始知仙者隱殊
不在深山

雨

半夜西亭雨離人獨啟閑素麻荒舊國 電照
前山細滴高槐底繁叢疊漏間唯應孤鏡裏明
月長愁顏

邊將

上馬乘秋欲建勳飛孤夜闕出師頻若無紫塞
煙塵事誰識青樓歌舞人戰骨沙中金鏃在賀
筵花畔玉蟬新由来邊卒皆如此只是君門合
殺身

錢塘夜宴留別郡守

四方騷動一州安夜列罇罍伴客懽歲粟調高

山閣迥蝦蟆更促海聲寒

郝天挺云江南以木
柝警夜故曰蝦蟆更

屏間佩響箴歌妓幕外刀光立從官沉醉不愁
歸棹遠晚風吹上子陵灘

送南海僧遊蜀

真修絕故鄉一衲度暄涼此世能先覺他生豈
再忘定中船過海臘後路沿湘野迥鴉隨笠山
深虎背囊瀑流垂石室蘿蔓蓋銅梁却後何年
會西方有上房

和友人許裳題宣平里古藤

欲結千年茂生來便近松迸根通井潤交葉覆
庭穠歷代頻更主盤空漸變龍晝風圓影亂宵
雨細散重蓋密勝丹桂層危類遠峰嫩條懸野
鼠枯節叫秋蛩翠老霜難蝕斂多蘚乍封幾家

遙共翫何寺不堪容容對忘離榻僧 誤過鐘
頃因陪預作終夕遶枝筇

送友尉蜀中

以下詩並
集外補入

故友漢中尉請為西蜀吟人家多種橘風土愛
彈琴水向昆明闊山通大夏深理閒無別事時
寄一登臨